

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

ZAKON O ZAŠTITI OD POŽARA

Sarajevo, juli 2023. godine

ZAKON O ZAŠTITI OD POŽARA

POGLAVLJE I - OSNOVNE ODREDBE

Član 1.

(Predmet Zakona)

Ovim zakonom uređuje se: funkcionisanje sistema zaštite od požara, nosioci i obaveze subjekata, planiranje i provođenje mjera za zaštitu od požara, nadležnost, organizacija zaštite od požara radi otkrivanja i sprečavanja opasnosti od požara te spašavanja ljudi i materijalnih dobara ugroženih požarom, kao i stručno osposobljavanje i usavršavanje zaposlenih lica, finansiranje, nadzor nad provođenjem ovog zakona i druga pitanja od značaja za organizaciju i funkcionisanje zaštite od požara u Federaciji Bosne i Hercegovine (u daljnjem tekstu: Federacija).

Član 2.

(Funkcionisanje sistema zaštite od požara)

(1) Zaštita od požara, prema ovom zakonu, obuhvata skup mjera i radnji upravne, organizacione, tehničke, obrazovne i propagandne prirode, koje se preduzimaju radi provođenja, kontrole mjera i radnji te sprečavanja izbijanja i širenja požara, njegovog otkrivanja i spašavanja ljudi, materijalnih dobara, kao i zaštite okoliša ugroženog požarom.

(2) Radi pravilne primjene mjera za zaštitu od požara iz stava (1) ovog člana, Federalno ministarstvo unutrašnjih poslova - Federalno ministarstvo unutaršnjih poslova (u daljnjem tekstu: FMUP) i kantonalno ministarstvo unutrašnjih poslova (u daljnjem tekstu: KMUP) daju mišljenja i saglasnosti na dokumentaciju i druge akte koji se izrađuju u skladu sa propisima iz oblasti prostornog uređenja i građenja, a u kojima se utvrđuju mjere za zaštitu od požara, za pitanja koja se odnose na zaštitu od požara, u skladu s ovim zakonom.

Član 3.

(Obaveze subjekata, odnosno nosilaca zaštite od požara)

(1) Subjekti, odnosno nosioci zaštite od požara, prema ovom zakonu, su organi uprave i upravne organizacije Federacije (u daljnjem tekstu: organi uprave Federacije), organi uprave i upravne organizacije kantona (u daljnjem tekstu: organi uprave kantona), odnosno gradova i općina i druga pravna i fizička lica koja se nalaze na području Federacije.

(2) Zaštitu od požara provode, osim subjekata, odnosno nosilaca iz stava (1) ovog člana i pravna lica i organizacije koje obavljaju vatrogasnu djelatnost i djelatnost zaštite i spašavanja, u skladu sa propisima kojima se uređuje područje vatrogastva te zaštite i spašavanja.

(3) Nosioci zaštite od požara iz st. (1) i (2) ovog člana obavezni su da preduzmu sve mjere zaštite od požara i radnje kojima će osigurati da njihova imovina ugrožena opasnostima od požara ne ugrožava živote drugih ljudi, njihovu imovinu i okoliš.

Član 4.

(Način i postupak organizovanja poslova zaštite od požara u okviru FMUP-a i KMUP-a)

(1) Radi pravilne primjene najviših nivoa organizacijskih, stručnih i tehničkih standarda iz oblasti zaštite od požara, poslovi zaštite od požara, utvrđeni ovim zakonom, organizacijski i kadrovski će se organizovati u FMUP-u i KMUP-u, što će se utvrditi pravilnikom o unutrašnjoj organizaciji tih organa.

(2) Pravilnikom o unutrašnjoj organizaciji iz stava (1) ovog člana u okviru poslova iz oblasti zaštite od požara organizuju se i poslovi u vezi sa prijevozom opasnih materija, kao i prometom eksplozivnih materija i zapaljivih tečnosti i gasova, što će se definisati posebnim zakonima.

Član 5.

(Načelo odgovornosti)

(1) Organi uprave Federacije, organi uprave kantona, grada i općine, pravna lica, kao i fizička lica smatraju se odgovornim za provođenje mjera zaštite od požara utvrđenih ovim zakonom.

(2) Odgovorno lice za organizovanje zaštite od požara iz stava (1) ovog člana je:

- a) vlasnik, odnosno korisnik imovine kada se radi o privatnom vlasništvu,
- b) rukovodioci organa uprave Federacije, rukovodioci organa uprave kantona, grada i općine (u daljnjem tekstu: rukovodioci organa uprave),
- c) direktor u privrednom društvu i drugom pravnom licu (u daljnjem tekstu: pravno lice) i lice koje je određeno općim aktom pravnog lica.

Član 6.

(Mjesta i objekti na kojima se organizuje i provodi zaštita od požara)

Zaštita od požara obavezno se organizuje i provodi u svim mjestima, prostorima, građevinama i drugim objektima koje koriste subjekti iz člana 3. ovog zakona.

Član 7.

(Preventivna zaštita od požara)

(1) Preventivna zaštita od požara utvrđena ovim zakonom i podzakonskim propisima donesenim na osnovu ovog zakona obavezno se provodi u svim organima uprave Federacije, organima uprave kantona, grada i općine, pravnim licima koja obavljaju djelatnost ličnim radom, odnosno sredstvima u vlasništvu građana i pojedinci - fizička lica, koji su dužni da organizuju zaštitu od požara, osiguraju njeno nesmetano funkcionisanje i da provode preventivne mjere.

(2) Preventivnu zaštitu iz stava (1) ovog člana predstavljaju sve mjere i radnje koje su dužne da preduzimaju lica iz stava (1) ovog člana, utvrđenu ovim zakonom i podzakonskim propisima donesenim na osnovu ovog zakona.

(3) U svrhu značajnijeg poduzimanja aktivnosti u provođenju preventivnih mjera zaštite od požara, ustanovljava se stalna tradicionalna manifestacija pod nazivom „MJESECI ZAŠTITE OD POŽARA“, koja se održava svake godine tokom

maja i oktobra, a organizuju je i provode FMUP, KMUP-ovi, pravna lica, uprave civilne zaštite i druge institucije u Federaciji, u skladu sa programom koji donose.

Član 8.

(Značenje pojedinih izraza)

Pojedini izrazi upotrijebljeni u ovom zakonu imaju sljedeća značenja:

- 1) **požar** je proces nekontrolisanog sagorijevanja gorive materije kojim se ugrožavaju život i zdravlje ljudi, materijalna dobra i životna okolina, a koji je karakterističan po istovremenom ispuštanju toplote, dima, plamena i toksičnih gasova;
- 2) **otvorena vatra** je svaka zapaljena vatra izvan pokrivenog objekta ili izvan zatvorenog ognjišta;
- 3) **eksplozija** je iznenadna ekspanzija gasa koja može proizaći iz brze reakcije oksidacije ili raspada sa porastom temperature i koja može dovesti do pojave požara i nekontrolisanog širenja čestica;
- 4) **zapaljive materije** su čvrste, tečne i gasovite materije koje se pale pod djelovanjem izvora paljenja;
- 5) **eksplozivne materije** predstavljaju gasovite, tečne i čvrste materije, jedinjenja ili smjese koje se pod uticajem određenog impulsa razlažu u veoma kratkom vremenskom intervalu, uz oslobađanje velike količine gasova i toplotne energije;
- 6) **opasne materije** su one materije koje u svim formama postojanja i svim uslovima korištenja svojim negativnim karakteristikama, kao što su: eksplozivnost, zapaljivost, korozivnost, otrovnost, radioaktivnost i drugo, mogu biti uzročnik različitih štetnih djelovanja i opasnosti po zdravlje ljudi, oštećenja ili uništenja materijalnih dobara uslijed razarajućeg, termičkog ili fiziološkog djelovanja te ugrožavanja radne i životne sredine;
- 7) **ugroženost od požara** je mogućnost ozlijede i/ili oštećenja kao posljedica požara;
- 8) **požarna otpornost** je sposobnost objekta da ispuni, u određenom vremenu, zahtjeve otpornosti na požar i/ili integriteta i /ili termičke izolacije i/ili druge očekivane zahtjeve, kako je propisano važećim BAS standardima;
- 9) **rizik od požara** je proizvod vjerovatnoće pojave požara koja se može očekivati u datoj tehničkoj operaciji ili stanju i posljedice ili obim šteta koje se mogu očekivati u slučaju pojave požara;
- 10) **požarna sigurnost** je sigurnost kojom se vjerovatnoća nastanka požara svodi na minimum;
- 11) **požarni sektor** je osnovna prostorna jedinica dijela građevine, koja se samostalno tretira u pogledu tehničkih i organizacijskih mjera zaštite od požara, a podijeljen ili odijeljen je od ostalih dijelova građevine konstrukcijama otpornim na požar;
- 12) **požarno stepenište** je stepenište koje se koristi samo u slučaju opasnosti od požara za evakuaciju ili za gašenje požara;
- 13) **sigurnosno stepenište** je stepenište u objektu odvojeno od unutrašnjih prostorija konstruktivnim elementima otpornosti na vatru u trajanju od najmanje 60 minuta, oslobođeno svih gorivih materija i osigurano od zadimljavanja za vrijeme dok se ne završi evakuacija ljudi i gašenje požara;
- 14) **evakuacija** je organizovano izmještanje ljudi i materijalnih dobara s ugroženog prostora na prostor siguran od požara;
- 15) **put za evakuaciju** je posebno projektovan i izveden put koji vodi od bilo koje tačke u građevini do vanjskog prostora ili sigurnog prostora u građevini čiji

- karakteristike (otpornost i reakcija na požar, širina, visina, označavanje, protupanična rasvjeta i dr.) omogućavaju da osobe zatečene u požaru mogu sigurno (samostalno ili uz pomoć spasitelja) napustiti građevinu;
- 16) **građevinom** se smatra građevinski objekt trajno povezan sa tlom koji se sastoji od građevinskog sklopa i ugrađene opreme, koji u okviru tehnološkog procesa zajedno čine tehnološku cjelinu, kao i samostalno postrojenje trajno povezano sa tlom;
 - 17) **građevine za javnu upotrebu** su: škole, obdaništa, studentski i đачki domovi, starački domovi, bolnice – zdravstvene ustanove, hoteli, moteli, pansioni, tržišni centri, tržnice, pozorišta, kinodvorane, sportske, koncertne i druge dvorane, stadioni, sale za konferencije, muzeji, aerodromi, željezničke i autobuske stanice, objekti kulturno-historijskog naslijeđa i drugi objekti;
 - 18) **mjere zaštite od požara** su sve organizacijske, tehnološke i tehničke mjere koje smanjuju rizik od požara i povećavaju požarnu sigurnost, a provode se u uravnoteženoj kombinaciji pasivnih i aktivnih mjera zaštite od požara;
 - 19) **pasivne mjere za zaštitu od požara** predstavljaju građevinsko-arhitektonske mjere koje se temelje na požarnom i dimnom sektoriranju građevine, upotrebi negorivih i teško gorivih materijala, sprečavanju prenosa požara po fasadi itd.;
 - 20) **aktivne (represivne) mjere za zaštitu od požara** su tehničke mjere koje podrazumijevaju primjenu sistema aktivne zaštite od požara;
 - 21) **preventivne mjere za zaštitu od požara** su sve preventivne organizacijske, građevinske i tehničko-tehnološke mjere koje smanjuju mogućnost za nastanak požara, a pri njegovom nastanku omogućavaju sigurnu evakuaciju ljudi i imovine te sprečavaju njegovo širenje;
 - 22) **sistem aktivne zaštite od požara** obuhvata instalacije, uređaje i opremu za automatsko otkrivanje, dojavu, sprečavanje širenja i gašenje požara, odvođenje dima i toplote iz požara, detekciju eksplozivnih gasova, rezervno snabdijevanje električnom energijom i drugo;
 - 23) **vlasnik imovine** je fizičko ili pravno lice, državni organ ili druga institucija sa zaštićenim najširim ovlaštenjima posjedovanja, korištenja i raspolaganja nekom stvari;
 - 24) **korisnik imovine** je fizičko ili pravno lice, državni organ ili druga institucija koji na osnovu ugovora koristi imovinu vlasnika sa preuzetom obavezom po pitanju provođenja propisanih mjera zaštite od požara;
 - 25) **akcident** je nezgoda, nesreća namjerno ili ne namjerno izazvana, od čijih posljedica može stradati veći broj ljudi, nastati materijalna šteta, štetne posljedice po okoliš i dr.;
 - 26) **promet zapaljivih, eksplozivnih i drugih opasnih materija** podrazumijeva nabavku, prodaju i upotrebu, kao i skladištenje u magacinima, priručnim skladištima i prodavnicama;
 - 27) **pružanje intelektualnih usluga iz oblasti zaštite od požara** je davanje stručnih mišljenja iz oblasti zaštite od požara, izrada i pregled projektne dokumentacije iz oblasti zaštite od požara;
 - 28) **zaposleno lice** podrazumijeva radnike u pravnim licima i drugim institucijama, kao i državne službenike i namještenike u organima državne službe Federacije, kantona, općine i grada;
 - 29) **priznata pravila tehničke struke i prakse** su smjernice ili norme koje se primjenjuju u Federaciji u slučaju nedostatka domaćih propisa, kao i strani propisi kojima se uređuje područje zaštite od požara;

30) **pasivno dežurstvo (pripravnost za rad)** je obaveza dostupnosti za rad u slučaju potrebe u vrijeme kada se ne radi (nakon redovnog radnog vremena, u vrijeme vikenda te državnih i vjerskih praznika).

Član 9.

(Zaštita od požara od posebnog interesa za Federaciju)

Zaštita od požara je od posebnog interesa za Federaciju, a provodi se na način predviđen ovim zakonom, podzakonskim propisima donesenim na osnovu ovog zakona i priznatim pravilima tehničke struke i prakse, a koji se odnose na mjere zaštite od požara utvrđene ovim zakonom.

Član 10.

(Način uređenja poslova vatrogastva, zaštite i spašavanja)

Pitanja u vezi sa zaštitom od požara, a koja se odnose na vatrogastvo, represivne mjere, zaštitu i spašavanje ljudi i materijalnih dobara, uređuju se posebnim propisima.

Član 11.

(Primjena odredbi ovog zakona na tehnološke eksplozije)

Odredbe ovog zakona primjenjuju se i na tehnološke eksplozije koje nastaju kao posljedica upotrebe eksplozivnih materija, zapaljivih tečnosti i gasova te ostalih gorivih materija koje sa zrakom mogu stvoriti eksplozivnu atmosferu, ako posebnim propisom nije drugačije određeno.

Član 12.

(Primjena Zakona na građevine i prostore institucija Bosne i Hercegovine i Oružanih snaga Bosne i Hercegovine)

Odredbe ovog zakona primjenjuju se na građevine i prostore organa i institucija Bosne i Hercegovine i Oružanih snaga Bosne i Hercegovine koji se nalaze na području Federacije, ako propisom Bosne i Hercegovine nije drugačije određeno.

Član 13.

(Primjena Zakona o upravnom postupku)

Postupci koji se vode prema ovom zakonu radi utvrđivanja činjenica ili drugih podataka koji se odnose na zaštitu od požara i donošenja rješenja i drugi slučajevi predviđeni ovim zakonom provode se prema odredbama Zakona o upravnom postupku.

Član 14.

(Gramatička terminologija)

Gramatička terminologija u vezi sa korištenjem muškog ili ženskog roda za pojmove u ovom zakonu uključuje oba roda.

POGLAVLJE II - NADLEŽNOST, ORGANIZACIJA, FUNKCIONISANJE, PLANIRANJE I PROVOĐENJE MJERA ZAŠTITE OD POŽARA

Odjeljak A. Nadležnost organa za provođenje zaštite od požara

Član 15.

(Provođenje, praćenje i stručna obrada dokumenata i drugih akata)

Stručnu obradu dokumenata i drugih akata te preduzimanje drugih radnji iz oblasti zaštite od požara, prema ovom zakonu, dužni su da izrađuju, prate i donose Vlada Federacije Bosne i Hercegovine (u daljnjem tekstu: Vlada Federacije), organi uprave Federacije i drugi organi Federacije, organi uprave kantona i drugi organi kantona, gradovi i općine na način utvrđen u čl. od 16. do 21. ovog zakona i drugim odredbama ovog zakona i podzakonskim propisima donesenim na osnovu ovog zakona.

Član 16.

(Nadležnost Vlade Federacije)

Vlada Federacije:

- a) donosi procjenu ugroženosti od požara i plan zaštite od požara koji su od značaja za Federaciju;
- b) razmatra stanje zaštite od požara na području Federacije i utvrđuje odgovarajuće mjere za dogradnju i efikasno funkcionisanje zaštite od požara;
- c) planira potrebna finansijska sredstva u budžetu Federacije za finansiranje potreba zaštite od požara iz nadležnosti Federacije u skladu sa mogućnostima u budžetu;
- d) obavlja i druge poslove iz oblasti zaštite od požara, u skladu s ovim zakonom i drugim propisima.

Član 17.

(Nadležnosti organa uprave Federacije i drugih organa Federacije)

(1) Organi uprave Federacije i drugi organi Federacije, u okviru svog djelokruga rada, organizuju i provode zaštitu od požara radi zaštite ljudi i materijalnih dobara i zaštite okoliša.

(2) Organi uprave Federacije i drugi organi Federacije, pored poslova iz stava (1) ovog člana, obavljaju i sljedeće poslove zaštite od požara:

- a) učestvuju u izradi procjene ugroženosti od požara i plana zaštite od požara iz člana 16. tačka a) ovog zakona, iz oblasti za koju su osnovani;
- b) učestvuju u realizaciji plana i programa zaštite od požara u skladu sa svojim nadležnostima;
- c) postupaju po uputama FMUP-a za pitanja iz oblasti zaštite od požara;
- d) obavljaju i druge poslove zaštite od požara, u skladu s ovim zakonom i drugim propisima.

Član 18. *(Nadležnosti FMUP-a)*

FMUP je osnovni nosilac organizacije i funkcionisanja zaštite od požara u Federaciji te obavlja sljedeće poslove:

a) učestvuje u izradi procjene ugroženosti od požara i plan zaštite od požara iz člana 17. stav (2) tačka a) ovog zakona;

b) izvršava zadatke zaštite od požara utvrđene u dokumentima iz tačke a) ovog člana i ostvaruje saradnju s organima uprave Federacije i drugim organima Federacije u izvršavanju zadataka zaštite od požara iz njihove nadležnosti;

c) planira, organizuje i provodi mjere zaštite od požara;

d) poduzima preventivne mjere za sprečavanje izbijanja požara i ublažavanja posljedica požara;

e) ostvaruje odgovarajuću saradnju s organima uprave kantona i drugim organima kantona i službama grada i općina u pitanjima zaštite od požara koja su ovim zakonom stavljena u nadležnost kantona, grada i općine i tim organima pruža odgovarajuću stručnu i drugu pomoć radi pravilnog i potpunog obavljanja tih poslova;

f) učestvuje u akcijama zaštite i spašavanja ljudi i materijalnih dobara ugroženih požarom ili eksplozijama;

g) izdaje odobrenje za obavljanje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara i vodi evidenciju izdatih odobrenja;

h) organizuje polaganje stručnog ispita za lica koja obavljaju poslove ispitivanja ispravnosti i funkcionalnosti ugrađenog sistema zaštite od požara i vodi evidencije o položenom stručnom ispitu;

i) organizuje i provodi polaganje stručnog ispita za lica koja obavljaju projektovanje mjera za zaštitu od požara i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara i vodi evidencije o položenom stručnom ispitu;

j) izdaje odobrenje pravnim licima za projektovanje mjera zaštite od požara i/ili kontrole/revizije dokumentacije i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara i vodi evidencije izdatih odobrenja;

k) određuje (utvrđuje) posebne uslove građenja koji se odnose na primjenu mjera zaštite za građevine u skladu sa članom 35. ovog zakona;

l) izdaje saglasnosti za elaborat zaštite od požara iz člana 39. ovog zakona;

m) daje mišljenja na prostorne i druge planove zaštite od požara u skladu s ovim zakonom;

n) rješava po žalbama koje se izjave na rješenja KMUP-a a koja su donesena na osnovu ovog zakona;

o) ostvaruje odgovarajuću saradnju s institucijama Bosne i Hercegovine u pitanjima koja su od zajedničkog interesa za Federaciju, sa nadležnim organom zaštite od požara Republike Srpske i Brčko Distrikta Bosne i Hercegovine, a saradnju sa susjednim i drugim državama u pitanjima zaštite od požara koja su od zajedničkog interesa ostvaruje posredstvom Ministarstva sigurnosti Bosne i Hercegovine;

p) vodi elektronski registar izdatih odobrenja za pravna lica ovlaštena za ispitivanje aparata za gašenje početnih požara izdata od KMUP-ova;

r) izdaje odobrenje pravnim licima za provođenje stručne obuke i osposobljavanje zaposlenih lica u pravnim licima iz oblasti zaštite od požara i vodi evidencije o izdatim odobrenjima;

s) vrši nadzor nad primjenom odredaba ovog zakona i propisa donesenih na osnovu ovog zakona, odnosno planova zaštite od požara i drugih akata koji se odnose na zaštitu od požara;

t) ostvaruje saradnju s ostalim subjektima, odnosno nosiocima zaštite od požara iz člana 3. ovog zakona;

u) obavlja i druge poslove iz oblasti zaštite od požara koji su ovim zakonom i podzakonskim propisima stavljeni u nadležnost FMUP-a.

Član 19.

(Nadležnosti kantona u oblasti zaštite od požara)

Kanton, u oblasti zaštite od požara:

a) organizuje i provodi zaštitu od požara iz nadležnosti kantona, u skladu s ovim zakonom i drugim propisima;

b) donosi procjenu ugroženosti od požara za područje kantona;

c) donosi plan zaštite od požara kantona i osigurava njegovu realizaciju;

d) osigurava finansijska sredstva u budžetu kantona potrebna za zaštitu od požara;

e) obavlja i druge poslove zaštite od požara, u skladu s ovim zakonom;

f) uređuje organizaciju i način funkcionisanja zaštite od požara na području kantona za pitanja koja nisu regulisana ovim zakonom.

Član 20.

(Nadležnost KMUP-a)

KMUP je osnovni nosilac organizacije i funkcionisanja zaštite od požara u kantonu te obavlja sljedeće poslove:

a) poduzima odgovarajuće mjere i aktivnosti na organizovanju i provođenju zaštite od požara na području kantona, u skladu s ovim zakonom i pitanjima koja uredi kanton;

b) učestvuje u izradi procjene ugroženosti od požara i plana zaštite od požara za područje kantona, uz učešće organa uprave kantona i drugih organa kantona;

c) planira, organizuje i nadzire provođenje mjera za zaštitu od požara;

d) poduzima preventivne mjere za sprečavanje izbijanja požara i ublažavanja posljedica požara;

e) izdaje odobrenja za rad servisa za ispitivanje aparata za gašenje početnih požara;

f) organizuje polaganje ispita za obavljanje poslova ispitivanja aparata za gašenje početnih požara;

g) organizuje obuku za osposobljavanje pripadnika specijalističko-spasilačkih jedinica pravnih lica iz člana 58. stav (4) ovog zakona i polaganje ispita za pripadnike tih jedinica;

h) ostvaruje saradnju sa gradskim i općinskim službama za zaštitu od požara na području kantona u pitanjima od značaja za kanton i tim službama pruža stručnu i drugu pomoć u oblasti zaštite od požara;

i) ostvaruje odgovarajuću saradnju sa FMUP-om, kao i sa kantonalnim organima uprave i drugim organima susjednih kantona o pitanjima od zajedničkog interesa za zaštitu od požara;

j) organizuje polaganja ispita za zaštitu od požara za zaposlena lica koja su u pravnom licu određena da se staraju za obavljanje poslova zaštite od požara, kao i za lica raspoređena u službi zaštite od požara u skladu sa programom koji donosi federalni ministar unutrašnjih poslova (u daljnjem tekstu: ministar);

k) određuje (utvrđuje) posebne uslove građenja koji se odnose na primjenu mjera zaštite za građevine u skladu sa članom 35. ovog zakona iz svoje nadležnosti;

l) izdaje saglasnosti za elaborat o zaštiti od požara iz člana 39. ovog zakona;

m) daje mišljenja za prostorne planove zaštite od požara u skladu s ovim zakonom;

n) saraduje s ostalim subjektima zaštite od požara;

o) obavlja i druge poslove iz oblasti zaštite od požara, u skladu s ovim i drugim zakonom.

Član 21.

(Nadležnost općine, odnosno grada)

Općina, odnosno grad obavlja sljedeće poslove:

a) uređuje organizaciju i funkcionisanje zaštite od požara na području općine, odnosno grada, u skladu s ovim zakonom i drugim propisima i osigurava provođenje te zaštite;

b) organizuje i provodi zaštitu od požara iz nadležnosti općine, odnosno grada u skladu s ovim zakonom i propisima općine, odnosno grada;

c) prati i unapređuje postojeće stanje zaštite od požara na području općine, odnosno grada;

d) donosi procjenu ugroženosti od požara i plan zaštite od požara iz nadležnosti općine, odnosno grada;

e) planira i osigurava finansijska sredstva u budžetu općine, odnosno grada za potrebe zaštite od požara;

f) organizuje poslove dimnjačarske djelatnosti u skladu sa članom 32. ovog zakona;

g) poduzima odgovarajuće mjere i aktivnosti na organizaciji i provođenju zaštite od požara na području općine, odnosno grada, u skladu s ovim zakonom, propisima kantona i općine, odnosno grada;

h) ostvaruje saradnju sa susjednim općinama u pitanjima od zajedničkog interesa za zaštitu od požara;

i) donosi odluku o uslovima i načinu spaljivanja poljoprivrednog i drugog gorivog otpada biljnog porijekla na otvorenom prostoru;

j) obavlja i druge poslove iz oblasti zaštite od požara koji su ovim zakonom, kao i drugim propisima i odlukama općinskog, odnosno gradskog vijeća stavljeni u nadležnost općine, odnosno grada.

Odjeljak B. Organizacija i funkcionisanje zaštite od požara

Član 22.

(Procjena ugroženosti od požara)

(1) Organizacija i funkcionisanje zaštite od požara u Federaciji, kantonu, gradu i općini utvrđuje se na osnovu procjene ugroženosti od požara, čije mjere i radnje su utvrđene u planu iz člana 23. ovog zakona.

(2) Metodologiju za izradu procjene ugroženosti od požara donosi Vlada Federacije na prijedlog ministra.

Član 23.

(Plan zaštite od požara)

(1) Organizacija i funkcionisanje zaštite od požara u Federaciji, kantonu, gradu i općini utvrđuje se u planu zaštite od požara Federacije, kantona, grada i općine.

(2) Plan zaštite od požara usvaja Vlada Federacije, vlada kantona, gradsko i općinsko vijeće, svako iz svoje nadležnosti.

(3) Plan zaštite od požara, na osnovu procjene ugroženosti od požara, za vlastite potrebe dužni su izraditi subjekti iz člana 3. ovog zakona, za građevine razvrstane u odgovarajuće kategorije ugroženosti od požara prema odredbama člana 37. ovog zakona.

(4) Plan zaštite od požara u pravnim licima donosi odgovarajući organ upravljanja, a u organima uprave Federacije i drugim organima Federacije, organima uprave kantona i drugim organima kantona, grada i općine rukovodilac koji rukovodi tim organom, odnosno institucijom.

Član 24.

(Sadržaj plana zaštite od požara)

(1) U planovima zaštite od požara utvrđuju se:

- a) organizacija zaštite od požara;
- b) plan evakuacije i uputstva za postupanje u slučaju požara;
- c) način upotrebe specijalističko-spasilačkih jedinica pravnih lica i/ili vatrogasnih jedinica;
- d) sistem obavještanja;
- e) postupak u slučaju požara;
- f) tehnička oprema i sredstva za gašenje požara;
- g) način snabdijevanja vodom;
- h) putevi, prolazi i prilazi za gašenje požara;
- i) saradnja sa drugim vatrogasnim i spasilačkim jedinicama, kao i sa jedinicama Oružanih snaga Bosne i Hercegovine i
- j) druge mjere potrebne za uspješno funkcionisanje i unapređivanje zaštite od požara i provođenje nadzora nad izvršavanjem mjera zaštite od požara.

(2) Planovi zaštite od požara iz stava (1) ovog člana usklađuju se sa novonastalim promjenama.

(3) Ukoliko u toku kalendarske godine nije bilo novonastalih promjena koje bitno utiču na promjenu plana zaštite od požara, donosioci planova iz člana 23. stav

(4) ovog zakona donose poseban akt kojim potvrđuju da nisu postojale novonastale promjene koje zahtijevaju usklađivanje plana zaštite od požara.

(4) Vlada Federacije će na prijedlog ministra donijeti propis kojim će bliže urediti pitanja iz stava (1) ovog člana te način i postupak izrade plana zaštite od požara iz člana 23. stava (2) ovog zakona, kao i druga pitanja koja se odnose na izradu plana zaštite od požara.

Član 25.

(Rok i način praćenja izvršenja plana zaštite od požara)

Radi praćenja izvršenja plana zaštite od požara iz člana 23. stav (2) ovog zakona, vlada kantona, odnosno gradsko vijeće, a u općini - općinsko vijeće, svake godine do kraja februara razmatra i ocjenjuje njegovu realizaciju iz prethodne godine i vrši odgovarajuće izmjene sa novonastalim promjenama koje su važne za zaštitu od požara, kao što su urbanističke i građevinske promjene, kao i promjene namjene građevina i slično te utvrđuje mjere za njegovu potpunu realizaciju, a posebno mjere koje se odnose na osiguravanje neophodnih finansijskih sredstava za izvršavanje planiranih zadataka.

Član 26.

(Obaveza u izvršavanju zadataka utvrđenih u planu zaštite od požara)

Pravna i fizička lica, organi uprave Federacije, organi uprave kantona, odnosno gradova i općina dužni su izvršavati zadatke utvrđene u planu zaštite od požara iz člana 23. stav (3) ovog zakona, koji se odnose na njih.

Član 27.

(Provođenje zaštite od požara za šume, šumska i poljoprivredna zemljišta)

Zaštita od požara se organizuje i provodi i za šume, šumska i poljoprivredna zemljišta te ostale prirodne resurse.

Odjeljak C. Planiranje i provođenje mjera zaštite od požara

Član 28.

(Donošenje općeg akta)

(1) Pravna lica, organi uprave Federacije, organi uprave kantona, odnosno gradova i općina dužni su svojim općim aktom, a u skladu sa vrstom djelatnosti koju obavljaju i procesom rada, urediti pitanja koja se odnose na organizaciju i funkcionisanje zaštite od požara u svojim objektima i prostorima i to:

a) utvrditi način organizovanja i ostvarivanja zaštite od požara, u skladu s ovim zakonom i podzakonskim propisima;

b) utvrditi mjere za provođenje i unapređenje zaštite od požara;

c) propisati način upoznavanja zaposlenih lica s opasnostima od požara na radnom mjestu, prilikom prijema i raspoređivanja tih lica na radno mjesto, kao i prilikom premještanja sa jednog na drugo radno mjesto;

d) odrediti dužnosti i odgovornosti svih zaposlenih lica u provođenju propisanih mjera zaštite od požara;

e) urediti obavezu i način stručnog osposobljavanja zaposlenih lica za provođenje mjera zaštite od požara na radnim mjestima, kao i izradu posebnih radnih uputstava za zaposlena lica koja su raspoređena na radna mjesta za koja se, zbog postojanja povećane opasnosti od požara, moraju predvidjeti posebne mjere zaštite od požara;

f) odrediti zaposleno lice koje će biti zaduženo da se stara o provođenju mjera zaštite od požara utvrđenih ovim zakonom, s tim da to lice mora imati položen ispit iz člana 20. tačka j) ovog zakona;

g) utvrditi način donošenja i provođenja plana zaštite od požara za vlastite potrebe;

h) urediti način vršenja unutarnje kontrole, provođenja predviđenih mjera za zaštitu od požara i način vođenja evidencije o provođenju propisanih mjera za zaštitu od požara;

i) odrediti mjesto i prostore u kojima mora biti zabrana proizvodnje, korištenje i prenošenje otvorene vatre;

j) utvrditi dužnosti i način ponašanja zaposlenih lica u slučaju pojave požara;

k) odrediti disciplinsku odgovornost za zaposlena lica zbog nepridržavanja propisanih mjera za zaštitu od požara;

l) utvrditi način saradnje službe za zaštitu od požara sa službom unutrašnje zaštite ljudi i imovine, službom zaštite na radu, civilnom zaštitom.

(2) Izuzetno, pravna lica sa većim izvorima opasnosti umjesto lica iz tačke f) stava (1) ovog člana mogu formirati stručnu službu zaštite od požara i utvrditi nadležnost te službe, što se provodi u skladu sa propisom iz člana 29. stav (3) ovog zakona.

(3) Pravna lica, organi uprave Federacije, organi uprave kantona, odnosno gradova i općina, dužni su upoznati sva zaposlena lica s općim aktom iz stava (1) ovog člana, o čemu vode evidenciju, te provoditi stručnu obuku i osposobljavanje za zaštitu od požara na način predviđen u članu 69. ovog zakona.

Član 29.

(Služba za zaštitu od požara i/ili lice zaduženo za planiranje i provođenje mjera za zaštitu od požara)

(1) Za planiranje i provođenje mjera za zaštitu od požara utvrđenih ovim zakonom i općim aktom iz člana 28. ovog zakona pravna lica i organi uprave Federacije, organi uprave kantona, odnosno gradova i općina dužni su utvrditi način organizovanja poslova zaštite od požara, koji se mogu obavljati na način da se formira stručna služba za zaštitu od požara ili da posebnim aktom odrede radnika koji će pratiti provođenje mjera za zaštitu od požara.

(2) Poslove iz stava (1) ovog člana dužna su obavljati lica koja imaju položen ispit iz člana 20. tačka j) ovog zakona, s tim da rukovodilac službe za zaštitu od požara iz stava (1) ovoga člana mora imati položen stručni ispit iz člana 47. ovog zakona.

(3) Vlada Federacije, odnosno vlade kantona, uzimajući u obzir izraženost (veličinu) izvora opasnosti i značaj pravnog lica, odredit će pravna lica iz stava (1) ovog člana koja su dužna organizovati službu zaštite od požara i način organizovanja te službe.

Odjeljak D. Odgovornosti vlasnika, odnosno korisnika građevina i drugih prostora za provođenje mjera za zaštitu od požara

Član 30.

(Odgovornost vlasnika, odnosno korisnika građevine i prostora za zaštitu od požara)

(1) Vlasnik, odnosno korisnik građevine i prostora odgovoran je za zaštitu od požara u tim građevinama, odnosno objektima i dužan je da osigura i provodi mjere zaštite od požara utvrđene ovim zakonom i uputama datim od nadležnog organa kako bi se osigurala zaštita građevine, odnosno prostora od požara u skladu sa članom 31. ovog zakona.

(2) Za provođenje mjera za zaštitu od požara u višespratnim građevinama - stambenim objektima - upravitelj stambenog objekta odgovoran je za provođenje mjera za zaštitu od požara u skladu s ovim zakonom i drugim propisima kojima se regulišu pitanja zaštite od požara.

Član 31.

(Obaveze vlasnika, odnosno korisnika građevina i drugih nekretnina)

Radi provođenja obaveza iz člana 30. ovog zakona vlasnici, odnosno korisnici građevina i drugih nekretnina te prostora, odnosno upravitelji zgrada dužni su:

a) osigurati provođenje mjera propisanih ovim zakonom, propisima donesenim na osnovu ovoga zakona te drugim propisima, planovima, aktima i odlukama iz zaštite od požara na njihovom području i/ili vlasništvu,

b) poduzeti mjere za smanjenje opasnosti od nastanka i širenja požara, kao i mjere za unapređenje stanja zaštite od požara na svom vlasništvu uzimajući u obzir ugroženost i stanje zaštite od požara,

c) posjedovati uređaje, opremu, alat i sredstva za dojavu, gašenje i sprečavanje širenja požara na svom vlasništvu, odnosno na svom području u količinama, vrsti i na mjestima kako je utvrđeno posebnim propisima te procjenama i planovima zaštite od požara.

Član 32.

(Uređenje dimnjačarske djelatnosti)

(1) Vlasnici, korisnici građevina i upravitelji stambenih objekata iz člana 30. ovog zakona dužni su da provode poslove dimnjačarske djelatnosti u skladu sa propisom iz st. (2) i (3) ovog člana.

(2) Općinsko, odnosno gradsko vijeće svojom odlukom uređuje organizaciju i rad dimnjačarske djelatnosti, rokove čišćenja dimnjaka, uvjete za obavljanje dimnjačarske službe i druga pitanja od značaja za obavljanje dimnjačarske djelatnosti te obavljanje nadzora nad radom dimnjačarske službe.

(3) Ukoliko je dimnjačarska djelatnost organizovana na nivou kantona ili za više općina, odnosno gradova u kantonu, propis iz stava (2) ovog člana donosi nadležni organ kantona.

Član 33.

(Mjere za zaštitu od požara)

(1) Mjere za zaštitu od požara, u smislu ovog zakona, predstavljaju sljedeće radnje i postupke:

a) izbor lokacije i dispozicija građevine, kao i izbor materijala, uređaja instalacija i konstrukcija kojim će se spriječiti ili svesti na najmanju mjeru mogućnost izbijanja i širenja požara;

b) izgradnja prilaznih puteva i prolaza za vatrogasna vozila i tehniku;

c) izgradnja požarnih stepeništa i pomoćnih izlaza;

d) osiguranje potrebnih količina vode i drugih sredstava za gašenje požara;

e) organizovanje osmatračko-dojavne službe, izrada i održavanje protivpožarnih prosjeka i puteva, osiguranje opreme i sredstava za gašenje šumskih požara te druge mjere zaštite od požara na otvorenom prostoru;

f) zabrana upotrebe otvorene vatre i drugih izvora paljenja na mjestima i prostorima gdje bi zbog toga moglo doći do prenošenja i širenja požara, čime bi se ugrozili ljudski životi i nastupila materijalna šteta;

g) izbor i održavanje tehnoloških procesa i uređaja kojima se osigurava zaštita od požara;

h) postavljanje uređaja za javljanje, gašenje i sprečavanje širenja požara, uređaja za mjerenje koncentracije zapaljivih i eksplozivnih gasova, para ili prašine u vazduhu i drugih uređaja za kontrolu sigurnog odvijanja tehnološkog procesa;

i) održavanje i kontrola ispravnosti uređaja i instalacija čija neispravnost može uticati na nastanak i širenje požara;

j) obuka svih zaposlenih lica i građana u praktičnoj upotrebi aparata za gašenje početnog požara, kao i drugih priručnih sredstava i opreme za gašenje požara.

(2) Mjere iz stava (1) ovog člana dužni su provoditi svi vlasnici i/ili korisnici građevina i drugih nekretnina te prostora, odnosno upravitelji zgrada koje koriste u svom radu.

Član 34.

(Mjere zaštite od požara u oblasti prostornog planiranja)

(1) Organ uprave nadležan za poslove prostornog uređenja osigurat će da se pri izradi dokumenata prostornog uređenja i to: prostornog plana Federacije, prostornog plana područja posebnih obilježja Federacije, prostornog plana kantona, prostornog plana područja posebnih obilježja kantona, prostornog plana općine, odnosno grada, urbanističkog plana, regulacionog plana i urbanističkog projekta predvide prostorne i tehničke mjere zaštite od požara, a naročito:

a) uslove za efikasno spašavanje ljudi, životinja, materijalnih dobara i zaštite okoliša;

b) potrebne razmake ili protivpožarnu udaljenost između objekata;

c) saobraćajne i manipulativne površine za interventna vozila;

d) izvode za dovoljno snabdijevanje vodom za gašenje požara;

e) primjenu odgovarajućih materijala koji ne mogu biti uzročnici nastanka i širenja požara.

(2) Uz dokumente iz stava (1) ovog člana izrađuje se elaborat o zaštiti od požara i/ili elaborat o zonama opasnosti prostora ugroženog eksplozivnom atmosferom (u daljnjem tekstu: elaborat), u kojem se razrađuju mjere iz stava (1)

ovog člana i na koji mišljenje daju FMUP i KMUP na način utvrđen u stavu (3) ovog člana.

(3) Na dokumente iz stava (1) ovog člana mišljenja daju i to:

a) na prostorni plan Federacije i prostorni plan područja posebnih obilježja Federacije - mišljenje daje FMUP,

b) na prostorni plan kantona, prostorni plan područja posebnih obilježja kantona, prostorni plan općine, odnosno grada, urbanistički plan, regulacioni plan i urbanistički projekat - mišljenje daje KMUP.

(4) Nadležni organi koji izrađuju dokumente iz stava (1) ovog člana dužni su prije usvajanja tih dokumenata pribaviti mišljenje iz stava (2) ovog člana.

(5) Federalno ministarstvo prometa i komunikacija, u saradnji sa FMUP-om, donijet će propis o uslovima za vatrogasne pristupe i prolaze za stambene i druge zgrade i objekte i za sve prostore koji se smatraju građevinama i prostorima u skladu sa stavom (1) ovog člana.

Član 35.

(Posebni uslovi građenja)

(1) FMUP, odnosno KMUP utvrđuje (određuje) posebne uslove građenja koji se odnose na primjenu mjera zaštite od požara, a kojim se uređuje planiranje i izgradnja složenih energetskih, vodoprivrednih, saobraćajnih i infrastrukturnih građevina ili njihovih dijelova, kao i privremenih objekata za potrebe sajмова i održavanje manifestacija, utvrđenih za građevine koje su kategorisane u požarnu ugroženost PU1 i PU2 u skladu sa čl. 36. i 37. ovog zakona.

(2) Posebni uslovi iz stava (1) ovog člana utvrđuju se na zahtjev nadležnog organa za prostorno uređenje i građenje.

(3) FMUP daje saglasnost na tehničku dokumentaciju i odobrava lokaciju za objekte koji služe za proizvodnju i skladištenje naoružanja, municije i vojne opreme (namjensku industriju).

(4) Odredbe ovoga člana na odgovarajući način primjenjuju se i na izmjene i/ili dopune rješenja o uslovima građenja te rješenja o izvedenom stanju koja se izdaju prema propisu kojim se uređuje područje prostornog planiranja i korištenja zemljišta na nivou Federacije.

Odjeljak E. Razvrstavanje građevina u odgovarajuće kategorije ugroženosti od požara

Član 36.

(Klasifikacija građevina prema ugroženosti od požara)

(1) Klasifikacija građevina iz stava (3) ovog člana obavlja se prema svojoj namjeni te se klasifikuju na građevine visokogradnje (klasa 1) i građevine niskogradnje (klasa 2) na osnovu klasifikacije vrsta građevinskih objekata Bosne i Hercegovine - KVGGO BiH, koja je statistički standard definisan Zakonom o statistici BiH.

(2) Građevinski objekti koji se koriste ili su projektovani za različite svrhe (npr. kombinacija stambene, hotelske i poslovne zgrade / građevine) moraju se razvrstati u jednu klasifikacionu šifru, prema glavnoj, tj. pretežnoj namjeni objekta.

(3) Na osnovu dodijeljene klasifikacije utvrđuje se kategorija ugroženosti od požara građevina visokogradnje i niskogradnje u zavisnosti od sljedećih kriterija: namjene građevine, broja ljudi koji u njima borave, zastupljenog tehničko-tehnološkog procesa, vrste i količine materijala koji se u njima proizvode, prerađuju, prodaju ili skladište, veličine i spratnosti građevine, lokacije građevine, vrste materijala koji su upotrijebljeni za izgradnju građevine, proračuna požarnog opterećenja.

Član 37.

(Kategorizacija prema ugroženosti od požara)

(1) Radi utvrđivanja odgovarajuće organizacije i preduzimanja preventivnih mjera za zaštitu od požara potrebnih za uspješno funkcionisanje i provođenje zaštite od požara, građevine se razvrstavaju u sljedeće kategorije požarne ugroženosti:

- a) požarna ugroženost PU1 – građevine sa visokim rizikom od izbijanja požara,
- b) požarna ugroženost PU2 – građevine sa srednjim rizikom od izbijanja požara,
- c) požarna ugroženost PU3 – građevine sa niskim rizikom od izbijanja požara.

(2) Kategorizacija građevine prema požarnoj ugroženosti treba da bude potvrđena numeričkim proračunom požarnog opterećenja na osnovu važećeg standarda.

(3) Vlasnici, odnosno korisnici i upravitelji građevina, građevinskih dijelova i drugih nekretnina te prostora razvrstani u određenu kategoriju ugroženosti od požara dužni su poduzimati i provoditi potrebne mjere za zaštitu od požara.

(4) Vlada Federacije, na prijedlog ministra, uz saglasnost Federalnog ministarstva za prostorno uređenje, propisuje osnove, mjerila i uvjete kategorizacije iz stava (1) ovog člana, kao i druga pitanja koja se odnose na kategorizaciju građevina.

Odjeljak F. Sadržaj i izrada projektne dokumentacije, izdavanje rješenja o odobrenju za građenje i upotrebu građevine

Član 38.

(Utvrđivanje mjera za zaštitu od požara u glavnom projektu)

(1) Vrsta i obim mjera za zaštitu od požara utvrđenih ovim zakonom za svaku građevinu definiše se glavnim projektom građevine za gradnju, projektovanje sistema aktivne zaštite od požara, dogradnju i rekonstrukciju objekta sa svim pripadajućim instalacijama, opremom i uređajima, a koji se izrađuje u skladu sa propisima kojima se reguliše pitanje prostornog uređenja i građenja.

(2) Glavni projekat iz stava (1) ovog člana za građevine PU1 i PU2 iz člana 37. ovog zakona sadrži elaborat, koji je sastavni dio projektne dokumentacije.

(3) Elaborat iz stava (2) ovog člana izrađuje pravno lice koje ima odobrenje FMUP-a iz člana 18. tačka j) ovog zakona.

(4) Za građevine razvrstane u kategoriju PU3 glavni projekat treba da sadrži samo potvrdu o primijenjenim mjerama zaštite od požara koji je ovjerilo pravno lice koje ima odobrenje iz stava (3) ovog člana.

(5) Odobrenje iz st. (3) i (4) ovog člana na period od pet godina može se izdati pravnom licu koje ispunjava sljedeće uslove:

a) da je registrovano za obavljanje djelatnosti projektovanja;
b) da ima stalno zaposlena dva lica koja imaju položen stručni ispit u toj struci u skladu sa propisima koji uređuju polaganje tog ispita, od kojih najmanje jedan projektant i/ili jedno lice mora da ima položen stručni ispit iz oblasti zaštite od požara za rad na poslovima za projektovanje mjera zaštite od požara i/ili posebnih sistema zaštite od požara i/ili pružanje intelektualnih usluga iz oblasti zaštite od požara iz člana 47. ovog zakona;

c) rješenjem se oduzima dato odobrenje ako se u pravnom licu promijene okolnosti tako da pravno lice ne ispunjava propisane uslove ili ako se u postupku nadzora utvrdi da se pravno lice prilikom izrade tehničke dokumentacije ne pridržava propisa i drugih normativa zaštite od požara;

d) pravno lice koje izrađuje tehničku dokumentaciju iz st. (2), (3) i (4) ovog člana, a nema zaposleno lice koje ispunjava uslove za odgovornog projektanta za zaštitu od požara, zaključuje ugovor sa pravnim licem registrovanim za izradu projektne dokumentacije koje u stalnom radnom odnosu ima zaposlenog projektanta za zaštitu od požara.

(6) Ministar će propisati način i postupak izdavanja odobrenja za projektovanje mjera zaštite od požara i/ili kontrole/revizije dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara i druga pitanja koja se odnose na izdavanje i/ili oduzimanje tog odobrenja.

Član 39. *(Sadržaj elaborata)*

(1) Elaborat iz člana 38. ovog zakona sadrži:

a) procjenu požarne ugroženosti s obzirom na lokaciju, dispoziciju i namjenu građevine, građevinske i tehničko-tehnološke karakteristike;

b) izbor tehničkih rješenja, tehnoloških, elektro, mašinskih, građevinskih i drugih mjera u funkciji zaštite od požara;

c) izbor mjera, tehničko-tehnoloških rješenja i građevinskih materijala u funkciji evakuacije i spašavanja ljudi i materijalnih dobara s opisom i uputstvima za postupak evakuacije;

d) izbor tehničke opreme i sredstava za gašenje požara, kao i drugih mjera u funkciji gašenja požara (putevi, prolazi, prilazi, snabdijevanje vodom i sl.);

e) opis organizacije posla i potrebna uputstva u vezi sa primijenjenim mjerama zaštite od požara;

f) zone opasnosti;

g) grafičke prikaze primijenjenih mjera zaštite od požara;

h) popis primijenjenih propisa, standarda i normativa, odnosno priznatih i dokumentovanih pravila tehničke prakse u inostranstvu koji nisu regulisani propisima, a koje je prihvatila BiH;

i) izjavu glavnog projektanta da su u projektnoj dokumentaciji primijenjene sve mjere zaštite od požara;

j) broj i datum dokumenta, koji je ovjeren potpisom i žigom.

(2) Za objekte i građevine posebne namjene (proizvodnja i skladištenje eksplozivnih materija, zapaljivih tečnosti i gasova), pored elaborata iz stava (1) ovog člana, pravni subjekti iz člana 3. ovog zakona dužni su izraditi i elaborat o zonama opasnosti prostora ugroženog eksplozivnom atmosferom, koji sadrži:

- a) definisanje opasnog prostora i zona opasnosti sa listom eksplozivnih i zapaljivih supstanci sa njihovim osnovnim fizičko-hemijskim karakteristikama koje su značajne s aspekta protiveksplozijske zaštite;
- b) svrhu i postupak klasifikacije prostora;
- c) izbor opreme i instalacija u zonama opasnosti;
- d) izbor električnih zaštita u zonama opasnosti;
- e) kratki opis tehnoloških procesa;
- f) prostorni raspored zona opasnosti;
- g) definisanje izvora opasnosti;
- h) proračun rasprostiranja potencijalno eksplozivne atmosfere;
- i) preporuke i instrukcije kojima se uređuje oblast zona opasnosti;
- j) grafičke prikaze primijenjenih mjera zaštite od požara i eksplozije;
- k) zaključak;
- l) propise i literaturu korištenu prilikom izrade elaborata;
- m) izjavu glavnog projektanta da su u projektnoj dokumentaciji primijenjene sve mjere zaštite ugroženog prostora izloženog eksplozivnoj atmosferi;
- n) broj i datum dokumenta, koji je ovjeren potpisom i žigom.

(3) Ministar će propisati sadržaj i postupak izrade elaborata zaštite od požara i elaborata o zonama opasnosti prostora ugroženog eksplozivnom atmosferom, kao i druga pitanja koja se odnose na izradu elaborata i projektovanje sistema aktivne zaštite od požara.

Član 40.

(Izrada elaborata i izdavanje potvrde o primijenjenim mjerama za zaštitu od požara)

(1) Izradu elaborata iz člana 38. stav (2) i izdavanje potvrde o primijenjenim mjerama zaštite od požara iz člana 38. stav (4) ovog zakona mogu obavljati samo pravna lica iz člana 38. stav (3) ovog zakona.

(2) Pravno lice iz stava (1) ovog člana dužno je mjere zaštite od požara predviđene u glavnom projektu prikazati tako da se na osnovu grafičkih prikaza, proračuna i tekstualnih objašnjenja može ocijeniti funkcionalnost i efikasnost predviđenih mjera za zaštitu od požara.

(3) Pravna lica iz stava (2) ovog člana koja su učestvovala u izradi glavnog projekta dužna su ga provjeriti na način utvrđen u članu 41. stav (4) ovog zakona i nakon provjere izdati potvrdu da su primijenjene mjere zaštite od požara u glavnom projektu izrađene u skladu s ovim zakonom, uvjetima uređenja prostora, tehničkim normativima i standardima te pravilima tehničke prakse.

Član 41.

(Kontrola / revizija projektne dokumentacije na primijenjene mjere iz oblasti zaštite od požara)

(1) Obaveznoj kontroli / reviziji elaborata kao sastavnog dijela glavnog projekta podliježu svi projekti građevina i objekata, projekti sistema aktivne zaštite od požara, kao i projekti za rekonstrukciju i sanaciju dijelova postojećih građevina.

(2) Kontrolor / revident može biti pravno lice koje ima odobrenje iz člana 18. tačka j) ovog zakona.

(3) Kontrolor / revident ne može obavljati kontrolu / reviziju projekta u čijoj je izradi u cijelosti ili djelomično sudjelovao ili ako je taj projekat u cijelosti ili djelomično izradilo pravno lice u kojem je zaposlen.

(4) Kontrolor / revident je dužan, nakon što obavi provjeru projekta, ovjeriti dijelove projekta te o tome sastaviti pisani izvještaj-mišljenje.

Član 42.

(Saglasnost za mjere za zaštitu od požara)

(1) Prije početka izgradnje i/ili dogradnje i/ili rekonstrukcije građevine i/ili objekta, uz zahtjev za izdavanje građevinske dozvole, investitor je dužan da pribavi saglasnost nadležnog organa unutrašnjih poslova za predviđene mjere i normative u pogledu zaštite od požara i eksplozija na revidiranu tehničku dokumentaciju - projekat, odnosno elaborat o zaštiti od požara, osim za:

a) individualnu stambenu izgradnju, porodične stambene zgrade namijenjene za stanovanje, površine do 500 m² i sa najviše četiri zasebne stambene jedinice;

b) za jednostavne objekte za koje građevinsku dozvolu izdaje nadležni organ lokalne samouprave, gdje glavni projekat sadrži elaborat ili potvrdu iz člana 38. st. (3.) i (4.) ovog zakona, kao što su:

- građevine sa prizemljem do dva sprata, bez korištenja podruma za stanovanje ili rad u kojima boravi najviše 100 osoba,

- građevine sa jednom etažom i bruto površinom manjom od 600 m², prizemne ili dvoetažne građevine koje nisu namijenjene za proizvodnju, preradu ili skladištenje opasnih materija, bez korištenja podruma kao radnog prostora, u kojima boravi manje od 100 osoba,

- građevine do 1.000 m² predviđene za skladištenje materijala bez opasnosti po čovjeka i okolinu,

- seoske ceste i poljski putevi bez pratećih energetske objekata,

- šumski i seoski mostovi;

c) za privremene objekte površine do 100 m² zatvorenog prostora, a u kojima se ne drže boje i lakovi i druge lakozapaljive materije;

d) objekte tipa - parkovi, šetališta, potporni zidovi, otvoreni sportski tereni, dječija igrališta itd.

(2) Organ nadležan za izdavanje odobrenja za građenje može izdati to odobrenje tek nakon pribavljene saglasnosti na tehničku dokumentaciju - projekat, odnosno elaborat o zaštiti od požara (za građevine PU1 i PU2 iz čl. 36. i 37. ovog zakona) tek kad ovlašteno lice MUP-a utvrdi da su u njima provedene mjere zaštite od požara predviđene u planskoj i tehničkoj dokumentaciji - projektu, odnosno elaboratu, kao sastavnom dijelu glavnog projekta, u kome se na sažet i cjelovit način na osnovu proračuna i tekstualnih objašnjenja moraju prikazati sve mjere zaštite od požara sa predviđenim, odabranim sistemom zaštite od požara, njegovom funkcionalnosti i efikasnosti, grafičkim priložima i sačinjenom listom tehničkih propisa u skladu s ovim zakonom s izjavom, potvrdom i ovjerom, potpisom glavnog projektanta i projektanta zaštite od požara.

(3) Saglasnost nadležnog organa unutrašnjih poslova obavezno je pribaviti za objekte:

a) za proizvodnju i skladištenje eksplozivnih materija;

b) u kojima se proizvode i skladište zapaljive tečnosti i plinovi (terminali, benzinske pumpe itd.) i druge opasne materije;

- c) industrijske zgrade / građevine i objekte za proizvodnju električne energije;
- d) magistralne i lokalne cjevovode za naftu i plin;
- e) građevine za javnu upotrebu najmanje spratnosti P+1 (prizemlje + sprat) u kojima se okuplja ili boravi više od 100 ljudi, kao što su: škole, obdaništa, studentski i đачki domovi, bolnice - zdravstvene ustanove, hoteli, moteli, pansioni, pozorišta, kinosale, tržni centri, aerodromi, željezničke i autobuske stanice, objekti kulturno-historijskog naslijeđa i drugi objekti;
- f) visoke objekte i objekte blokovskog tipa;
- g) građevine iznad 1.000 m² predviđene za skladištenje materijala;
- h) autoceste i brze ceste, priključke na ove putne objekte, mostove AB i čelične dužine do 100 m i visine do 22 m, tunele i prolaze, granične prelaze;
- i) aerodrome, tunele, željezničku infrastrukturu sa priključcima;
- j) nadzemne i podzemne garaže za automobile preko pet garažnih mjesta i bruto površinom većom od 600 m²;
- k) luke i plovne kanale te brodogradilišta za pristajanje putničkih brodova dužine iznad 10 m.

Član 43.

(Predviđanje i primjena mjera za zaštitu od požara pri projektovanju i gradnji građevina i ugradnji priključaka, opreme, uređaja i postrojenja)

(1) Građevine moraju biti projektovane i izgrađene tako da se u slučaju požara:

- a) čuva nosivost konstrukcije, da ne dođe do širenja vatre i dima unutar građevine i na susjedne objekte;
- b) omogući da lica mogu neozlijeđena napustiti građevinu ili njihovo spašavanje;
- c) omogući zaštita vatrogasca ili spasioca;
- d) građevina mora biti projektovana i izgrađena da prilikom normalnog korištenja ne može da dođe do eksplozije.

(2) Pri projektovanju i gradnji građevina i ugradnji priključaka, opreme, uređaja i postrojenja, kao i njihovoj proizvodnji, moraju se predvidjeti i primijeniti mjere zaštite od požara koje će omogućiti:

- a) smanjenje mogućnosti nastanka požara;
- b) pravovremeno otkrivanje i obavještanje o požaru;
- c) efikasno spašavanje radnika i materijalnih dobara s gradilišta;
- d) ograničavanje širenja vatre i dima;
- e) efikasno gašenje požara;
- f) osiguranje saobraćajnih i manipulativnih površina za interventna vozila te
- g) ispunjenje drugih zahtjeva koje moraju ispunjavati građevine i ugrađeni materijali u vezi sa zaštitom od požara koji imaju svojstva otpornosti na požar i/ili reakciju na požar, a koji se potvrđuju certifikatom.

Član 44.

(Požarno stepenište)

(1) Pri projektovanju stambenih i poslovnih objekata, industrijskih građevina, energetskih objekata i građevina za javnu upotrebu (bolnice, hoteli, sportske i druge

dvorane, robne kuće, škole, saobraćajne stanice, aerodromi i drugi slični objekti) određuju se požarni sektori i nužni izlazi.

(2) Pored komunikacionog stepeništa u objekte iz stava (1) ovog člana, tlocrtne površine preko 1.200 m², obavezno se projektuje požarno i/ili sigurnosno stepenište ili prelazi u drugi požarni sektor, pod uslovom da je kota podova najviše etaže viša od 22 m iznad najniže kote okolnog terena.

(3) Požarno stepenište se određuje na osnovu odgovarajućih standarda iz člana 39. stav (1) tačka h) ovog zakona i proračuna požarnog opterećenja, načina širenja požara, rizika od požara i materijalne vrijednosti građevine ili njezinog dijela.

Član 45.

(Projektovanje i postavljanje električne, ventilacione, gasne, naftovodne, toplovodne, gromobranske i drugih instalacija, uređaja i dimovoda)

(1) Električne, ventilacione, gasne, naftovodne, toplovodne, gromobranske i druge instalacije i uređaji, kao i dimovodi i ložišta, moraju se projektovati, postaviti, odnosno izvoditi, koristiti i održavati prema propisima o tehničkim normativima i standardima koji se odnose na ta pitanja, kao i uputstvima proizvođača, o čemu mora postojati dokumentacija.

(2) Instalacije i uređaji iz stava (1) ovog člana mogu se upotrebljavati samo ako su ispravni i ako su pravilno postavljeni, što se utvrđuje atestom o ispravnosti instalacija.

Član 46.

(Nadležnost FMUP-a i KMUP-a za donošenje akata prema ovom zakonu)

(1) Posebne uslove građenja koji se odnose na primjenu mjera zaštite od požara iz člana 35. ovog zakona, a vezano za odobrenje za upotrebu izgrađene ili rekonstruisane, dograđene ili nadograđene građevine iz člana 42. ovog zakona, daje se tek kad FMUP, odnosno KMUP dadne saglasnost da su u njima provedene mjere zaštite od požara predviđene u elaboratu iz člana 38. stav 2. i člana 39. st. (1) i (2) ovog zakona.

(2) Saglasnost iz stava (1) ovog člana FMUP daje za građevine za koje odobrenje za upotrebu izdaje Federalno ministarstvo prostornog uređenja, a KMUP daje za građevine za koje odobrenje za upotrebu izdaje nadležni organ kantona, grada ili općine.

Član 47.

(Stručni ispit koji organizuje FMUP)

(1) Stručni ispit za projektovanje mjera za zaštitu od požara i/ili posebnih sistema zaštite od požara i/ili pružanje intelektualnih usluga iz oblasti zaštite od požara iz člana 38. stav (5) tačka b) ovog zakona može polagati lice koje ispunjava sljedeće uslove:

- a) da je državljanin Bosne i Hercegovine;
- b) da se protiv njega ne vodi krivični postupak i da nije kažnjavano za krivična djela protiv života i krivično djelo protiv imovine;

- c) da ima visoku stručnu spremu tehničkog - tehnološkog smjera (VSS), odnosno visoko obrazovanje prvog, drugog ili trećeg ciklusa Bolonjskog sistema studiranja (koji se vrednuje sa 240 ECTS bodova);
- d) da ima najmanje tri godine radnog iskustva u struci nakon sticanja diplome (mašinska, elektro, građevinska, arhitektonska, zaštita od požara, zaštita na radu, hemijska, tehnološka).

(2) Stručni ispit iz stava (1) ovog člana, izuzetno, ne moraju polagati lica koja imaju najmanje pet godina radnog iskustva na poslovima inspeksijskog nadzora iz oblasti zaštite od požara u ministarstvu unutrašnjih poslova, što dokazuju potvrdom nadležnog MUP-a, radi dobijanja uvjerenja o oslobađanju polaganja stručnog ispita.

(3) Lica koja su položila stručni ispit iz oblasti zaštite od požara po propisima kantona i drugim propisima koji su do donošenja ovog zakona bili u primjeni na području Federacije, dužna su dodatno polagati dio stručnog ispita iz stava (1) ovog člana utvrđenog u programu iz stava (5) ovog zakona u dijelu koji se odnosi na specifičnosti struke i djelatnostima za koje se opredjeljuju i prijavljuju, što se uređuje propisom iz stava (5) ovog zakona.

(4) Ispit iz stava (1) ovog člana polaže se pred komisijom koju sačinjavaju predstavnici ministarstva unutrašnjih poslova (ovisno o regionalnoj zastupljenosti kandidata) te mentori iz oblasti zaštite od požara, a koju imenuje federalni ministar.

(5) Ministar će propisati sadržaj programa, način i postupak polaganja stručnog ispita iz stava (4) ovog člana te druga pitanja koja se odnose na polaganje tog ispita.

Član 48.

(Izdavanje odobrenja za upotrebu objekta)

(1) Odobrenje za upotrebu izgrađene ili rekonstruisane, dograđene ili nadograđene građevine nadležni organ za urbanizam i građenje može izdati tek kada član komisije za tehnički pregled građevine i/ili objekta, koji vrši pregled sa stanovišta zaštite od požara i/ili eksplozija, utvrdi na licu mjesta prilikom tehničkog pregleda građevine i potvrdi svojim mišljenjem da su provedene sve mjere zaštite od požara i/ili eksplozija predviđene u elaboratu iz člana 38. stav (2), člana 39. st. (1) i (2), čl. 42. i 46. ovog zakona, kao i odgovarajuća pravila tehničke struke i prakse, te dokumentuje:

a) da je osiguran dokaz o karakteristikama ugrađenih građevinskih materijala i elemenata konstrukcije odgovarajućih požarnih karakteristika i vatrootpornosti;

b) da je osigurana podjela građevine u požarne sektore;

c) da su osigurane propisane karakteristike požarnih i sigurnosnih stepeništa i puteva evakuacije;

d) da su propisno obilježeni putevi evakuacije i izlazi prema požarnim i sigurnosnim stepeništima ili u siguran prostor;

e) da je obezbijeđen dokaz o ispravnom djelovanju izvedenih instalacija i/ili uređaja i time osigurana funkcionalnost uređaja za odvođenje dima i toplote, protivpožarnih klapni, protivpožarnih vrata, hidrantske mreže, stabilnih instalacija za gašenje požara, uređaja / aparata za gašenje početnog požara, sistema za dojavu požara, uređaja za otkrivanje prisutnosti eksplozivnih para / gasova, sigurnosnog osvjetljenja (pomoćnog i paničnog) i druge predviđene mjere;

f) da su ispunjeni i drugi tehnički uslovi (arhitektonski, građevinski, elektro, mašinski itd.).

(2) Za poslove iz stava (1) ovog člana za tehnički pregled izgrađene ili rekonstruisane, dograđene ili nadograđene građevine, a koje raspisuju nadležni organi za urbanizam i građenje, mogu se imenovati i zaposlenici ministarstva unutrašnjih poslova i lica sa položenim stručnim ispitom prema ovom zakonu, koji za to ispunjavaju uslove u skladu sa propisom nadležnog organa kojim se reguliše tehnički pregled građevine i/ili objekta, ukoliko nisu učestvovali u izradi dokumentacije i izdavanju saglasnosti za elaborat zaštite od požara i/ili saglasnost za tehničku dokumentaciju i/ili odobrenja lokacije za predmetni objekat.

Odjeljak G. Nabavka i održavanje sredstava namijenjenih za dojavu, gašenje i sprečavanje širenja požara

Član 49.

(Održavanje i ispitivanje aparata za gašenje početnih požara)

(1) Vlasnici / korisnici objekata ili upravitelji dužni su da osiguraju odgovarajući broj i vrstu mobilnih ručnih i prevoznih aparata za gašenje početnih požara (u daljnjem tekstu: aparat), osiguraju njihov (redovni tromjesečni) pregled, održavanje i ispitivanje ispravnosti i funkcionalnosti (periodični i kontrolni), u skladu sa propisima o tehničkim normativima i standardima koji se odnose na ta pitanja i uputstvom proizvođača, odnosno najmanje jednom godišnje.

(2) Održavanje i ispitivanje aparata iz stava (1) ovog člana mogu obavljati pravna lica koja su registrovana i ovlaštena za tu djelatnost, a neposredne poslove održavanja i ispitivanja mogu obavljati lica koja su položila stručni ispit iz stava (6) ovog člana, s tim da se pod istim uvjetima za obavljanje tih poslova mogu angažovati profesionalne i dobrovoljne vatrogasne jedinice koje imaju ovlaštenje MUP-a.

(3) O svakom izvršenom pregledu i ispitivanju sačinjava se zapisnik koji sadrži: datum ispitivanja, identifikacijske podatke aparata, lokaciju aparata, ime i potpis lica koje je izvršilo ispitivanje te nedvosmisleni konstataciju o ispravnosti aparata i taj zapisnik se dostavlja vlasniku aparata.

(4) Evidenciona kartica se mora zalijepiti na aparat samo ako je ispitan i ispravan.

(5) Aparat čija se posuda ili neki njen dio moraju ispitivati na pritisak smatra se neispravnim ako ispitivanje iz stava (2) ovog člana nije obavljeno u skladu sa propisom iz stava (6) ovog člana, a aparat za koji ne postoji evidencija o njegovoj ispravnosti - smatra se neispravnim.

(6) Ministar će propisati uslove koje moraju ispunjavati pravna lica koja obavljaju kontrolu ispravnosti, servisiranje i održavanje aparata, kao i sadržaj i način polaganja ispita za lica koja lično (neposredno) obavljaju poslove ispitivanja, servisiranja i održavanja aparata iz stava (1) ovog člana, kao i druga pitanja koja se odnose na ispitivanje, održavanje i servisiranje aparata za gašenje početnih požara.

Član 50.

(Proizvodnja i promet uređaja, opreme i sredstava namijenjenih za zaštitu od požara i eksplozije)

(1) Proizvodnja i promet uređaja, opreme i sredstava namijenjenih za zaštitu od požara i eksplozije te drugih uređaja i instalacija u funkciji sprečavanja nastanka požara i eksplozije obavljaju se u skladu sa posebnim propisima koji se odnose na ta pitanja.

(2) U proizvodnji, postupcima i uslugama u kojima se koriste uređaji, oprema, sredstva i instalacije iz stava (1) ovog člana, za koje nisu doneseni standardi i propisi Bosne i Hercegovine, mogu se primjenjivati međunarodni standardi i propisi koji se odnose na ta pitanja, a koje je prihvatila Bosna i Hercegovina.

(3) Za uređaje, opremu i sredstva iz stava (1) ovog člana za koje je posebnim propisima predviđeno odobravanje (certifikovanje) prije stavljanja u promet, troškove certifikovanja snosi proizvođač - ako se radi o domaćoj proizvodnji, odnosno uvoznik ili zastupnik firme iz inostranstva - ako se radi o inostranoj proizvodnji.

(4) Domaći proizvođač, uvoznik ili zastupnik firme iz inostranstva, kao i posrednik u prodaji uređaja, opreme i sredstava iz stava (1) ovog člana ne smiju prodati krajnjem kupcu navedene uređaje, opremu i sredstva ukoliko nisu certifikovani po proceduri predviđenoj posebnim propisima iz člana 62. stav (1) ovog zakona i ako nemaju uputstvo na jednom od službenih jezika u Federaciji.

Odjeljak H. Primjena mjera zaštite od požara kod prometa i prodaje zapaljivih, eksplozivnih i drugih opasnih materija

Član 51.

(Promet zapaljivih, eksplozivnih i drugih opasnih materija)

(1) Zapaljive, eksplozivne i druge opasne materije ne smiju se upotrebljavati i skladištiti na način koji nije u skladu sa propisanim tehničkim normativima i standardima i koji nije siguran po rukovaoca i okolinu, što je uređeno posebnim propisima iz te oblasti.

(2) Prijevoz zapaljivih, eksplozivnih i drugih opasnih materija vrši se u skladu sa propisima kojima je uređena ta oblast.

Član 52.

(Prodaja zapaljivih, eksplozivnih i drugih opasnih materija)

Proizvođač ili prodavač ne smije staviti u prodaju zapaljive, eksplozivne i druge opasne materije ako nisu upakovane u propisanu ambalažu koja je označena odgovarajućim oznakama opasnosti i ako ne posjeduje propisanu dokumentaciju izdatu od proizvođača na jednom od službenih jezika u Federaciji, što se vrši u skladu sa propisima kojima je uređena ta materija.

Odjeljak I. Planiranje i provođenje mjera za zaštitu od požara u određenim oblastima

Član 53.

(Zaštita od požara u saobraćaju)

Prilikom prijevoza ljudi i životinja, kao i transporta roba u cestovnom, željezničkom, pomorskom, riječnom, jezerskom i avionskom saobraćaju i transportu cjevovodima, moraju se provoditi propisane mjere zaštite od požara.

Član 54.

(Zaštita od požara u šumama, na šumskom i poljoprivrednom zemljištu)

(1) Zaštita od požara u šumama, na šumskom i poljoprivrednom zemljištu organizuje se i provodi u skladu sa propisima koji se odnose na šume, šumsko i poljoprivredno zemljište, s tim što se mora postupiti i prema odredbi člana 33. stav (1) tač. e) i f) ovog zakona.

(2) Odgovornost za zaštitu od požara u šumama, na šumskom i poljoprivrednom zemljištu imaju sva pravna i fizička lica koja su vlasnici ili korisnici šuma, šumskog i poljoprivrednog zemljišta, kao i organi uprave Federacije, kantona, grada i općine koji su nadležni za šume i šumska zemljišta te poljoprivredno zemljište.

(3) Ako zaštita od požara u šumama, na šumskom i poljoprivrednom zemljištu nije uređena propisima iz stava (1) ovog člana, zaštita od požara se organizuje i provodi u skladu s ovim zakonom.

Član 55.

(Zaštita od požara u rudarskim objektima i lokalitetima)

Zaštita od požara u rudarskim objektima organizuje se i provodi u skladu s ovim propisom, osim u podzemnim objektima - jamama u kojima se vrši eksploatacija mineralnih sirovina, a u kojima se zaštita od požara provodi u skladu sa posebnim propisom.

Član 56.

(Zaštita od požara prirodnog i kulturno-historijskog nasljeđa)

Zaštita od požara prirodnog i kulturno-historijskog nasljeđa organizuje se i provodi u skladu sa planom zaštite od požara koji su dužni da izrade i provode nadležni organi, pravna lica i druge institucije kojima su data na korištenje i upravljanje zaštićena područja prirode i kulturno-historijskog nasljeđa.

Odjeljak J. Obavezne mjere zaštite od požara kod privremeno povećanog požarnog rizika i način organizovanja

Član 57.

(Mjere zaštite od požara u slučaju povećanog požarnog rizika)

(1) U slučaju privremenog povećanog požarnog rizika, za sve vrijeme njegovog trajanja, poduzimaju se odgovarajuće dodatne, organizacijske i tehničke mjere zaštite od požara na osnovu urađenog elaborata o zaštiti od požara za gradilište, uz primjenu odgovarajuće opreme i sredstava za gašenje, što uključuje i osigurano dežurstvo osposobljenih i obučениh lica za ovakve poslove.

(2) Dodatne mjere iz stava (1) ovoga člana poduzimaju se na osnovu izrađene procjene privremeno povećanog požarnog rizika, a posebno:

a) na privremenim mjestima koja nisu za to predviđena, na kojima se izvode radovi zavarivanja, rezanja i lemljenja, upotrebom opreme, aparata i uređaja s otvorenim plamenom i koji varniče, a koji mogu prouzrokovati nastajanje i širenje požara, što organizuje izvođač tih radova;

b) na mjestima na kojima se privremeno skladište zapaljive tečnosti i gasovi u količini do 5 m³, što organizuje vlasnik ili korisnik građevine;

c) u građevinama, građevinskim dijelovima i prostorima za vrijeme održavanja skupova na kojima se privremeno okuplja veći broj ljudi (sportske, privredne, zabavne, političke i druge manifestacije), a zadužen je organizator manifestacije;

d) na područjima na kojima se nalaze šume, šumsko ili poljoprivredno zemljište, koja su klasifikovana u I i II stepen ugroženosti od požara, utvrđene u propisima iz te oblasti, što organizuju vlasnici ili korisnici tih prostora;

e) na prostorima i objektima koji se odnose na zaštićena područja prirode i kulturno-historijskog nasljeđa organizuju organi uprave Federacije, organi uprave kantona, odnosno gradova i općina, pravno lice i druge institucije kojima su dati na korištenje i upravljanje ti prostori i objekti.

(3) Mjere iz stava (1) ovog člana mogu poduzimati lica iz člana 58. ovog zakona osposobljena za tu zaštitu u skladu sa programom obuke koja se provodi prema propisu iz člana 58. stav (4) ovog zakona te profesionalni i/ili dobrovoljni vatrogasci.

(4) Pod mjerama iz stava (1) ovog člana podrazumijeva se prisustvo više lica stručno osposobljenih za gašenje požara s odgovarajućom opremom i sredstvima za blagovremeno gašenje početnih požara.

(5) Za dežurstvo iz stava (2) tačka c) ovog člana potrebno je sačiniti plan preventivnog osiguranja kojim se određuju vatrogasno dežurstvo, odnosno broj stručno osposobljenih lica za gašenje požara, potrebna oprema, uređaji i druga sredstva potrebna za zaštitu od požara i plan evakuacije. Za vrijeme trajanja sportske, privredne, zabavne, političke ili druge manifestacije, sva vrata na putevima za evakuaciju moraju biti otključana, a putevi za evakuaciju prohodni.

(6) Za dežurstvo iz stava (2) tačka d) ovog člana organizuje se osmatračko-dojavna služba, što se vrši u skladu sa posebnim propisom kojim je uređena ova materija, a dežurstvo iz stava (2) tačke e) ovog člana organizuje se kao stalno dežurstvo i mora trajati sve dok traje potreba zbog koje je dežurstvo i određeno.

Član 58.

(Specijalističko-spasilački poslovi u pravnim licima)

(1) U planu zaštite od požara općine, grada, odnosno kantona određuju se pravna lica koja su obavezna organizovati specijalističko-spasilačke poslove u okviru službe za zaštitu od požara iz člana 28. ovog zakona.

(2) Obavezu iz stava (1) ovog člana imaju pravna lica u kojima se proizvode, prerađuju, distribuišu ili skladište zapaljive, eksplozivne i ostale opasne materije, u kojima zbog toga postoji povećana opasnost od požara ili eksplozija, što se određuje u procjeni ugroženosti od požara i planu zaštite od požara.

(3) Pravna lica koja nisu obuhvaćena stavom (2) ovog člana samostalno odlučuju o potrebi obavljanja specijalističko-spasilačkih poslova obavljaju u skladu sa svojom procjenom ugroženosti od požara i potrebama zaštite i spašavanja ljudi i materijalnih dobara pravnog lica.

(4) Ministar će propisati program obuke za osposobljavanje radnika za obavljanje specijalističko-spasilačkih poslova i način polaganja tog ispita.

Odjeljak K. Sistemi aktivne zaštite od požara, održavanje instalacija i certifikat o usklađenosti opreme

Član 59.

(Ugradnja i/ili ispitivanje ispravnosti i funkcionalnosti sistema aktivne zaštite od požara)

(1) Vlasnik ili korisnik građevine mora prilikom ugradnje sistema aktivne zaštite od požara posjedovati projektnu dokumentaciju i potrebne ateste te osigurati stručni nadzor nad izvođenjem radova za sistem aktivne zaštite od požara koji namjerava ugraditi.

(2) Ugradnju i/ili ispitivanje aktivnog sistema za zaštitu od požara može obavljati samo pravno lice koje ima odobrenje iz člana 18. tačka g) ovog zakona i koje zadovoljava posebne uslove u pogledu tehničke opremljenosti i ima zaposlena lica s ovlaštenjem FMUP-a za projektovanje i/ili izvođenje sistema aktivne zaštite od požara.

(3) Pravno lice koje je ugradilo sistem aktivne zaštite od požara dužno je korisniku / vlasniku sistema, nakon završetka ugradnje tog sistema, predati projekat izvedenog stanja sistema (ukoliko je bilo izmjene u odnosu na projektovano stanje), dati sve inicijalne korisničke pristupne šifre / kodove i podučiti ga o načinu promjene tih kodova vezano za centralu ugrađenog sistema, korisničko uputstvo za upotrebu, ateste i certifikate za sve elemente ugrađenog sistema i izjavu o kvalitetu izvedenih radova i ugrađene opreme, te izvršiti obuku lica koja će rukovati ugrađenim sistemom sa zapisnikom o provedenoj obuci lica koja će rukovati sistemom.

(4) Vlasnik ili korisnik građevine mora prije početka upotrebe ugrađenog sistema aktivne zaštite od požara pribaviti potvrdu o ispravnosti i funkcionalnosti sistema, kao i obavljati njegovu stalnu tehničku kontrolu, u skladu s ovim zakonom, tehničkim propisima i uputstvima proizvođača, koji se odnose na ta pitanja.

(5) Nakon obavljenog ispitivanja ispravnosti i funkcionalnosti, pravno lice koje je izvršilo ispitivanje izdaje potvrdu o ispravnosti i funkcionalnosti, s tim da prvo

ispitivanje ne može obavljati pravno lice koje je ugradilo sistem aktivne zaštite od požara.

(6) Potvrdu iz stava (4) ovog člana izdaje pravno lice koje ispunjava uslove za ispitivanje ispravnosti i funkcionalnosti, s tim što je to lice dužno ispitivanje ispravnosti i funkcionalnosti obavljati prema propisima iz stava (3) ovog člana.

(7) Kopiju potvrde o obavljenom prvom ispitivanju sistema aktivne zaštite od požara pravno lice koje je obavilo ispitivanje dostavlja nadležnoj inspekciji zaštite od požara.

(8) Vlasnik ili korisnik građevine u kojoj je ugrađen sistem za dojavu i gašenje požara, sistem za detekciju zapaljivih / eksplozivnih / toksičnih plinova i para u smjesi sa zrakom, uređaji za kontrolu i zaštitno djelovanje, uređaji za sprečavanje širenja požara, instalacije i uređaji izvedeni u protiveksplozijskoj zaštiti, dužan je osigurati držanje sistema u ispravnom i funkcionalnom stanju te redovno ispitivati njihovu ispravnost i funkcionalnost prema ovom zakonu, namjensku upotrebu opreme i sredstava kao i tehničke propise koji se odnose na ta pitanja, a najmanje jednom godišnje, o čemu mora voditi evidenciju i posjedovati dokumentaciju.

(9) Način izdavanja odobrenja za obavljanje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara, sadržaj potvrde o ispravnosti i funkcionalnosti ugrađenog sistema aktivne zaštite od požara, uslove koje moraju ispunjavati pravna lica koja obavljaju te poslove, kao i druga pitanja koja se odnose na sisteme aktivne zaštite od požara uređuju se propisom koji donosi ministar.

Član 60.

(Protočni kapacitet i pritisak vode u hidrantskoj mreži)

(1) Javno preduzeće ili drugo pravno lice koje upravlja vodovodnom i hidrantskom mrežom dužno je pri izgradnji, rekonstrukciji i korištenju ovih mreža osigurati potrebnu projektnu dokumentaciju i propisani protočni kapacitet i pritisak vode u hidrantskoj, odnosno vodovodnoj mreži za potrebe gašenja požara.

(2) Javna preduzeća ili druga pravna lica dužna su stalno održavati u ispravnom stanju hidrantsku mrežu iz stava (1) ovog člana, o čemu vode odgovarajuću evidenciju i o tome izvještavaju nadležnu profesionalnu vatrogasnu jedinicu.

(3) Vlasnici građevina i prostora te upravitelji stambenih objekata u kojima je po projektnoj dokumentaciji predviđena i ugrađena unutrašnja i vanjska hidrantska mreža dužni su osigurati njeno redovno ispitivanje ispravnosti i funkcionalnosti prema ovom zakonu, tehničkim propisima i uputstvima proizvođača, koji se odnose na ta pitanja, a najmanje jednom godišnje, o čemu moraju voditi evidenciju i posjedovati dokumentaciju.

Član 61.

(Održavanje instalacija)

(1) Vlasnici ili korisnici građevina i prostora te upravitelji stambenih objekata dužni su održavati u ispravnom stanju i periodično kontrolisati postrojenja, uređaje, električne, gasne, ventilacijske i druge instalacije, dimnjake i ložišta koji mogu prouzrokovati nastajanje i širenje požara, u skladu sa tehničkim propisima i

standardima na koje se ti propisi pozivaju te uputstvima proizvođača, o čemu moraju voditi evidenciju i posjedovati odgovarajuću dokumentaciju.

(2) Ako ugovorom o zakupu prostora ili objekta nisu definisane obaveze za održavanje instalacija iz stava (1) ovog člana, obaveze preuzima korisnik prostora, odnosno građevine.

Član 62.

(Certifikat o usklađenosti opreme, uređaja i drugih sredstava)

(1) Oprema, uređaji i druga sredstva za zaštitu od požara prije stavljanja u promet moraju biti usklađeni sa zahtjevima važećih propisa i standarda, što se dokazuje certifikatom o usklađenosti.

(2) Izgled i način postavljanja certifikacionog znaka mora biti u skladu s odgovarajućim propisima iz stava (1) ovog člana.

(3) Ocjenjivanje usklađenosti opreme, uređaja i drugih sredstava za zaštitu od požara može obavljati organ za ocjenjivanje usklađenosti koji ovlasti Ministarstvo vanjske trgovine i ekonomskih odnosa, u skladu sa Zakonom o tehničkim zahtjevima za proizvode i ocjenjivanje usklađenosti i propisima donesenim na temelju ovog zakona.

(4) Oprema, uređaji i druga sredstva za zaštitu od požara koji ne ispunjavaju uslove iz st. (1) i (2) ovog člana ne smiju se stavljati u promet i upotrebu.

(5) Oprema, uređaji i druga sredstva za zaštitu od požara prilikom izrade i/ili ugradnje moraju imati odgovarajuće ateste proizvođača sa tehničkom dokumentacijom i smjernicama za projektovanje usklađene sa propisima i standardima, preuzetim direktivama o uređajima i zaštitnim sredstvima namijenjenim upotrebi u prostorijama ugroženim potencijalno eksplozivnom atmosferom i prevedenim uputstvom o upotrebi na jednom od jezika u Federaciji sa preporukama o korištenju, tehničkoj informaciji, priloženoj shemi za upotrebu te održavanju opreme i uređaja.

Odjeljak L. Osiguranje građevina od požara i eksplozija

Član 63.

(Osiguranje od požara)

Osiguranje građevina od požara i eksplozija, koje vrše društva za osiguranje, sastavni je dio sistema zaštite od požara.

Član 64.

(Nosilac osiguranja od požara)

(1) Osiguranik od požarnog rizika koji koristi građevine i prostore u kojima može nastati požar ili koji olakšava njegovo širenje i objekte sa posebno rizičnim požarnim opterećenjem mora da se osigura od odgovornosti za štetu koju može nanijeti trećim licima, općini, gradu ili kantonu, odnosno Federaciji i bližim i daljnjim susjedima (odgovornost iz djelatnosti).

(2) Finansiranje zaštite od požara pravnih lica i udruženja koja obavljaju vatrogasnu djelatnost i djelatnost zaštite i spašavanja ljudi i materijalnih dobara osigurava se prema posebnom propisu kojim se uređuje oblast vatrogastva, zaštite i spašavanja.

Odjeljak M. Upoznavanje javnosti i informacijski sistem zaštite od požara

Član 65.

(Upoznavanje školskih ustanova o provođenju mjera zaštite od požara)

(1) Radi sticanja znanja, vještina i navika za unapređenje i učvršćivanje pozitivnih stavova i ponašanja značajnih za zaštitu od požara djece i učenika, nadležne školske i predškolske ustanove dužne su u okviru školskih i predškolskih programa utvrditi i provesti program edukacije o zaštiti od požara.

(2) Nadzor nad utvrđivanjem i provođenjem programa edukacije o zaštiti od požara provodi ministarstvo nadležno za obrazovanje.

Član 66.

(Upoznavanje građana o mjerama za zaštitu od požara)

KMUP je radi upoznavanja građana o mjerama za zaštitu od požara u mjestima u kojima postoji povećan stepen rizika od požara i eksplozije, te uticaja opasnih materija po zdravlje, život i okolinu u akcidentnim situacijama, izuzetnim slučajevima i sl., dužan putem nadležnih općinskih organa preduzeti radnje za upoznavanje sa provođenjem mjera zaštite od požara i otklanjanje uzroka koji doprinose riziku od nastanka požara i eksplozije na tom području.

Član 67.

(Obavješćavanje javnosti o zaštiti od požara)

(1) FMUP i KMUP-ovi su dužni kontinuirano putem medija ili na drugi način, odnosno drugim sredstvima informisanja, upoznati građane i pravna lica o mjerama zaštite od požara i načinu njihovog provođenja.

(2) Poslovi iz stava (1) ovog člana obavljaju se u okviru stručne službe iz člana 4. ovog zakona.

Član 68.

(Informacioni sistem zaštite od požara)

(1) FMUP vodi operativni centar za zaštitu od požara u kojem se sakupljaju i obrađuju podaci o događajima značajnim za zaštitu od požara u skladu s ovim zakonom.

(2) KMUP-ovi u okviru svojih operativnih centara organizuju funkcionalni dio informacionog sistema za zaštitu od požara koji je integrisan sa centrom iz stava (1) ovog člana.

(3) Pravna lica, organi uprave Federacije, organi uprave kantona, odnosno gradova i općina i druge institucije i građani dužni su operativnim centrima za zaštitu od požara dostavljati podatke o događajima koji se odnose na pojave požara i eksplozija, širenje požara, uzrocima nastanka požara, objektima i prostoru koji je

ugrožen požarom, posljedicama koje su nastale i druge podatke na području koje je ugroženo požarom ili eksplozijom.

(4) Sadržaj operativnog informacionog sistema iz oblasti zaštite od požara te način dostavljanja, obrade i objavljivanja podataka iz stava (3) ovog člana propisat će ministar.

POGLAVLJE III - STRUČNO OSPOSOBLJAVANJE I USAVRŠAVANJE ZAPOSLENIH LICA ZA ZAŠTITU OD POŽARA

Član 69.

(Stručna obuka zaposlenih lica)

(1) Pravna lica, organi uprave Federacije, organi uprave kantona, odnosno gradova i općina i druge institucije dužni su kontinuirano organizovati i provoditi stručno osposobljavanje i usavršavanje svih radnika, odnosno državnih službenika i namještenika (u daljnjem tekstu: zaposlena lica) u radnom odnosu za provođenje mjera za zaštitu od požara na radnim mjestima na kojima se nalaze.

(2) Osnovna obuka i osposobljavanje za sve novozaposlene odmah po stupanju u rad, a najkasnije u roku od 30 dana od stupanja u rad, obuhvata upoznavanje zaposlenih lica sa svim izvorima opasnosti i načinom provođenja mjera za zaštitu od požara utvrđenih u općem aktu iz člana 28. ovog zakona.

(3) Pored obuke iz stava (1) ovog člana, obavezno je najmanje jednom u tri godine provesti obuku i provjeru znanja iz oblasti zaštite od požara svih zaposlenih lica prema posebnom programu obuke iz stava (6) ovog člana.

(4) Zaposlena lica koja se u skladu s odredbom člana 28. stav (1) tačka f) ovog zakona odrede da se staraju o izvršavanju poslova zaštite od požara, odnosno lica raspoređena u službi zaštite od požara u pravnom licu, državnom organu i drugoj instituciji iz stava (2) tog člana, moraju imati najmanje srednju stručnu spremu i položen ispit za protivpožarnu zaštitu iz stava (6) ovog člana, koji moraju položiti u roku od godinu dana od dana zasnivanja radnog odnosa, odnosno raspoređivanja na poslove zaštite od požara.

(5) Zaposlenici su dužni da prisustvuju obuci i provjeri znanja iz oblasti zaštite od požara i da se u radu pridržavaju propisanih uputstava, zabrana, mjera zaštite od požara, upozorenja, kao i da u slučaju požara pristupe gašenju požara.

(6) Program obuke iz stava (3) i sadržaj programa te način polaganja ispita iz stava (4) ovog člana utvrđuje ministar.

Član 70.

(Način i postupak organizovanja stručne obuke i provjere znanja zaposlenih lica)

Poslove stručnog osposobljavanja, obuke i provjere znanja zaposlenih lica prema programu iz člana 69. stav. (6) ovog zakona mogu samostalno da organizuju i provode pravna lica, organi uprave Federacije, organi uprave kantona, odnosno gradova i općina i druge institucije koje dobiju odobrenje od KMUP-a ili da izvođenje te obuke povjere pravnim licima koja su registrovana za tu djelatnost a koja dobiju posebnu saglasnost, ovlaštenje FMUP-a, da ispunjavaju uslove za izvođenje obuke utvrđene u tom programu.

POGLAVLJE IV - FINANSIRANJE ZAŠTITE OD POŽARA

Član 71.

(Osiguranje finansijskih sredstava za organizovanje, provođenje i unapređenje zaštite od požara)

(1) Finansijska sredstva potrebna za organizovanje, provođenje i unapređenje mjera zaštite od požara predviđena ovim zakonom, kao i obučavanje i osposobljavanje zaposlenih lica planiraju i osiguravaju pravna lica, organi uprave Federacije, organi uprave kantona, odnosno gradova i općina i druge institucije, svako za svoje građevine i prostore te zaposlena lica.

(2) Finansijska sredstva za potrebe iz stava (1) ovog člana planiraju se i osiguravaju svake godine u okviru finansijskog plana pravnog lica, organa uprave Federacije, organa uprave kantona, odnosno gradova i općina i drugih institucija, u okviru sredstava za obavljanje njihove redovne djelatnosti.

Član 72.

(Osiguranje finansijskih sredstava u budžetu)

U budžetu Federacije, kantona, općine i grada osiguravaju se finansijska sredstva potrebna za finansiranje sljedećih obaveza:

- a) u budžetu Federacije - sredstva za obaveze utvrđene u čl. 16., 17. i 18. ovog zakona;
- b) u budžetu kantona - sredstva za obaveze utvrđene u čl. 19. i 20. ovog zakona;
- c) u budžetu općine, odnosno grada - sredstva za obaveze utvrđene u članu 21. ovog zakona.

Član 73.

(Poslovi zaštite od požara koji se finansiraju iz budžeta Federacije)

(1) Federacija finansira:

- a) obavljanje poslova zaštite od požara iz člana 17. ovog zakona koji su u nadležnosti federalnih ministarstava i drugih organa Federacije;
- b) pružanje pomoći kantonima, općinama i gradu za uklanjanje posljedica koje su nastale požarom radi stvaranja uslova za život ljudi na području koje je nastradalo požarom ili eksplozijom;
- c) istraživačke i razvojne projekte koji se odnose na razvoj i usavršavanje zaštite od požara od značaja za Federaciju;
- d) druge potrebe u vezi s obavljanjem zaštite od požara iz nadležnosti Federacije utvrđene ovim zakonom.

(2) Finansijska sredstva iz stava (1) ovog člana planiraju se i osiguravaju u budžetu Federacije na prijedlog Ministarstva u skladu sa mogućnostima u budžetu.

Član 74.

(Poslovi zaštite od požara koji se finansiraju iz budžeta kantona)

(1) Kanton finansira:

a) obavljanje poslova zaštite od požara iz člana 19. ovog zakona koji su u nadležnosti kantona;

b) učešće u saniranju posljedica na području kantona koje su nastale požarom, posebno radi stvaranja uslova za život ljudi na području nastradalom u požaru;

c) istraživačke i razvojne projekte od značaja za zaštitu od požara iz nadležnosti kantona;

d) druge potrebe u oblasti zaštite od požara iz nadležnosti kantona.

(2) Finansijska sredstva za finansiranje zadataka iz stava (1) ovog člana planiraju se i osiguravaju u budžetu kantona na prijedlog kantonalnog ministarstva unutrašnjih poslova.

Član 75.

(Poslovi zaštite od požara koji se finansiraju iz budžeta općine, odnosno grada)

(1) Općina, odnosno grad finansira:

a) obavljanje poslova zaštite od požara iz člana 21. ovog zakona koji su u nadležnosti općine i grada;

b) učešće u saniranju posljedica na području općine, odnosno grada koje nastanu požarom ili eksplozijom radi stvaranja neophodnih uslova za život ljudi na nastradalom području od požara, u skladu sa materijalnim mogućnostima općine, odnosno grada;

c) druge potrebe u oblasti zaštite od požara iz nadležnosti općine, odnosno grada.

(2) Finansijska sredstva za finansiranje zadataka iz stava (1) ovog člana planiraju se i osiguravaju u budžetu općine, odnosno grada, a na prijedlog načelnika / gradonačelnika.

POGLAVLJE V - IZVJEŠTAVANJE I EVIDENCIJE

Član 76.

(Izveštaj KMUP-a o zaštiti od požara)

(1) KMUP je dužan najmanje jednom godišnje sačiniti i pripremiti cjelovit izvještaj o provođenju mjera zaštite od požara utvrđenih ovim zakonom i podzakonskim propisima donesenim na osnovu ovog zakona.

(2) Izvještaj iz stava (1) ovog člana naročito sadrži podatke o: datim mišljenjima i saglasnostima na elaborate i mjere zaštite od požara u glavnom projektu, broju izdatih odobrenja za rad servisa za ispitivanje aparata za gašenje početnih požara, datim ovlaštenjima i vrsti obuka koje je KMUP proveo, ugrađenim stabilnim sistemima za gašenje požara, požarima i drugim pitanjima značajnim za zaštitu od požara.

(3) Izvještaj iz stava (1) ovog člana KMUP dostavlja vladi kantona i FMUP-u.

Član 77.

(Izveštaj FMUP-a o zaštiti od požara)

(1) FMUP najmanje jednom godišnje sačinjava i priprema izvještaj o provođenju mjera zaštite od požara utvrđenih ovim zakonom i podzakonskim propisima donesenim na osnovu ovog zakona.

(2) Izvještaj iz stava (1) ovog člana priprema se na osnovu podataka koje vodi FMUP i izvještaja iz člana 76. ovog zakona.

(3) Izvještaj iz stava (1) ovog člana FMUP dostavlja Vladi Federacije.

Član 78.

(Evidencije koje vodi FMUP)

FMUP vodi sljedeće evidencije o:

a) pravnim licima kojima je izdato odobrenje za obavljanje poslova ugradnje i/ili provjere i ispitivanja ispravnosti i funkcionalnosti aktivnog sistema za zaštitu od požara;

b) licima koja su polažila stručni ispit za obavljanje poslova ispitivanja ispravnosti i funkcionalnosti ugrađenog sistema zaštite od požara;

c) licima koja su položila stručni ispit za projektovanje mjera zaštite od požara i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara;

d) pravnim licima koja imaju odobrenje za projektovanje mjera zaštite od požara i/ili kontrole / revizije dokumentacije i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara;

e) objektima, odnosno građevinama za koje utvrđuje posebne uslove građenja koji se odnose na primjenu mjera zaštite od požara za građevine u skladu sa članom 35. ovog zakona;

f) pravnim licima kojima je izdata saglasnost na elaborat zaštite od požara iz člana 39. ovog zakona;

g) izdatim mišljenjima na prostorne i druge planove zaštite od požara u skladu s ovim zakonom;

h) pravnim licima kojima je izdato odobrenje za provođenje stručne obuke i osposobljavanje zaposlenih lica u pravnim licima iz oblasti zaštite od požara i vodi evidencije izdatih odobrenja.

Član 79.

(Evidencije koje vodi KMUP)

KMUP vodi sljedeće evidencije o:

a) pravnim licima koja imaju odobrenja za rad servisa za ispitivanje aparata za gašenje početnih požara;

b) licima koja su položila ispit za obavljanje poslova ispitivanja aparata za gašenje početnih požara;

c) licima koja su završila obuku za osposobljavanju pripadnika specijalističkih - spasilačkih jedinica pravnih lica i polažila ispit za specijalističkog spasioca;

d) licima koja su položila ispit za zaštitu od požara za zaposlena lica koja su u pravnom licu određena da se staraju za provođenje poslova zaštite od požara, kao i lica raspoređena u službi zaštite od požara;

e) objektima, odnosno građevinama za koje su određeni (utvrđeni) posebni uslovi građenja a koji se odnose na primjenu mjera zaštite od požara za građevine;

f) objektima, odnosno građevinama za koje je izdata saglasnosti na elaborat zaštite od požara iz člana 39. ovog zakona;

g) prostornim planovima zaštite od požara za koje su izdata mišljenja o primjeni mjera zaštite od požara.

Član 80.

(Evidencije koje vode pravna i fizička lica)

Pravna lica, organi uprave Federacije, organi uprave kantona, odnosno gradova i općina i druge institucije dužni su voditi evidenciju o požarima i eksplozijama na svojim građevinama i materijalnim dobrima prema propisu iz člana 81. ovog zakona.

Član 81.

(Propis o sadržaju evidencija)

Ministar će propisati sadržaj i način vođenja evidencija iz čl. 78. i 79. ovog zakona te sadržaj registra iz člana 18. tačka p) ovog zakona kao i druga pitanja koja se odnose na evidencije i registar.

POGLAVLJE VI - NADZOR NAD PROVOĐENJEM OVOG ZAKONA

Odjeljak A. Upravni nadzor

Član 82.

(Sadržaj upravnog nadzora)

(1) Upravni nadzor nad provođenjem ovog zakona provodi FMUP.

(2) Upravni nadzor obuhvata uvid i kontrolu zadataka i aktivnosti koje se odnose na provođenje mjera zaštite od požara, pregled akata i dokumentacije iz oblasti zaštite od požara, pružanje stručne pomoći davanjem stručnih objašnjenja i uputa za rad na upite pravnih lica, organa uprave Federacije, organa uprave kantona, odnosno gradova i općina i drugih institucija ili na drugi način traženje podataka i obavještenja o obavljanju poslova zaštite od požara, poduzimanje odgovarajućih mjera za pravilno postupanje u primjeni ovog zakona, kao i rješavanje u drugostepenom upravnom postupku u slučajevima predviđenim ovim zakonom.

(3) Pravna lica, organi uprave Federacije, organi uprave kantona, odnosno gradova i općina i druge institucije dužni su dostaviti podatke i dokumentaciju koju zatraži organ iz stava (1) ovog člana.

Član 83.

(Upravni nadzor iz nadležnosti KMUP-a)

KMUP provodi upravni nadzor u odnosu na pitanja koja su ovim zakonom stavljena u njegovu nadležnost. Taj nadzor se ostvaruje u pravnim licima, kantonalnim organima uprave i općinskim i gradskim službama za upravu na području kantona.

Član 84.

(Nadzor nad zakonitošću poduzetih aktivnosti i mjera u oblasti zaštite od požara)

Upravni nadzor iz čl. 82. i 83. ovog zakona odnosi se na nadzor nad zakonitošću poduzetih aktivnosti i mjera u oblasti zaštite od požara prema ovom zakonu.

Odjeljak B. Inspekcijski nadzor zaštite od požara

Član 85.

(Inspekcijski nadzor FMUP-a i KMUP-a)

(1) FMUP i KMUP obavljaju poslove inspekcijskog nadzora nad provođenjem mjera zaštite od požara određenih ovim zakonom i planovima zaštite od požara, kao i nad provođenjem propisa o tehničkim normativima i standardima koji se odnose na zaštitu od požara.

(2) Inspektori organa unutrašnjih poslova iz stava (1) ovog člana dužni su pri provođenju inspekcijskog nadzora ostvarivati odgovarajuću saradnju radi rješavanja pitanja od zajedničkog interesa.

Član 86.

(Pitanja koja su predmet inspekcijskog nadzora)

(1) FMUP i KMUP obavljaju poslove inspekcijskog nadzora nad provođenjem mjera zaštite od požara određenih ovim zakonom, podzakonskim propisima donesenim na osnovu ovog zakona, planovima zaštite od požara, kao pravilima i propisima tehničke prakse.

(2) Inspekcijski nadzor iz stava (1) ovog člana odnosi se na sljedeća pitanja:

a) organizovanje i provođenje zaštite od požara u organima uprave Federacije, organima uprave kantona, odnosno gradova i općina, pravnim licima i drugim institucijama u skladu s ovim zakonom i podzakonskim propisima donesenim na osnovu ovog zakona;

b) obavljanje poslova iz nadležnosti FMUP-a i KMUP-a iz čl. 18. i 20. ovog zakona;

c) donošenje planova zaštite od požara Federacije, kantona i pravnih lica od značaja za Federaciju i kanton u skladu s odredbama člana 23. ovog zakona;

d) opće akte iz člana 28. ovog zakona u organima uprave Federacije, organima uprave kantona i pravnim licima od značaja za Federaciju i kanton;

e) planiranje i osiguranje finansijskih sredstava za potrebe iz člana 72. ovog zakona u organima uprave Federacije, organima uprave kantona, odnosno gradova i općina i pravnim licima od značaja za Federaciju i kanton;

f) provođenje obuke i osposobljavanja zaposlenih lica iz člana 69. ovog zakona u organima uprave Federacije, organima uprave kantona, odnosno gradova i općina i pravnim licima od značaja za Federaciju i kanton.

Član 87.

(Subjekti u kojima FMUP obavlja inspekcijski nadzor)

FMUP obavlja inspekcijski nadzor nad provođenjem mjera zaštite od požara u pravnim licima i drugim institucijama u privatnom i državnom vlasništvu u sljedećim oblastima:

- a) industrijskim objektima za preradu i proizvodnju zapaljivih tečnosti i gasova;
- b) industrijskim objektima za proizvodnju eksplozivnih materija;
- c) pravnim licima koja se bave transportom i distribucijom gasa u gasovodima i drugim gasnim postrojenjima za tehnološki proces;
- d) objektima i postrojenjima za proizvodnju energije nazivne snage iznad 35 MW;
- e) skladištima zapaljivih tečnosti kapaciteta iznad 1.000 m³;
- f) skladištima zapaljivih gasova kapaciteta iznad 30 m³;
- g) pravnim licima za proizvodnju i skladištenje tehničkih plinova kapaciteta iznad 30 m³;
- h) skladištima zapaljivih gasova u bocama kapaciteta iznad 5.000 kg;
- i) objektima za proizvodnju farmaceutskih proizvoda;
- j) pravnim licima koja se bave prometom eksplozivnih materija, zapaljivih tečnosti i gasova, kao i prometom opasnih materija u dijelu za koje je nadležno Ministarstvo;
- k) pravnim licima i organima uprave Federacije i drugim institucijama kojima je povjereno na upravljanje područje prirodnog i kulturno-historijskog naslijeđa od značaja za Federaciju;
- l) pravnim licima, državnim organima i drugim institucijama koje se bave poslovima arhive i arhivske građe od značaja za nauku i historiju;
- m) pravnim licima i objektima u državnom vlasništvu koji nisu u kategoriji industrijskih objekata;
- n) pravnim licima koja proizvode, koriste ili skladište radioaktivne materije te nuklearno gorivo i druge štetne i opasne materije za ljude i okolinu;
- o) pravnim licima i objektima čiji je vlasnik ili osnivač Federacija, odnosno u kojima Federacija ima vlasnički udio;
- p) pravnim licima koja obavljaju poslove ispitivanja ispravnosti i funkcionalnosti ugrađenog sistema aktivne zaštite od požara;
- r) pravnim licima koja imaju odobrenje FMUP-a iz člana 18. tač. g), j) i r) ovog zakona;
- s) saraduje u akcijama policije vezanim za kontrolu prometa eksplozivnih i drugih opasnih materija;
- t) po potrebi i pozivu nadležnog organa, učestvuje u radu operativnih ekipa na razjašnjenju uzroka i utvrđivanju odgovornosti za nastanak većih požara, eksplozija i havarija te akcidenata s opasnim materijama.

Član 88.

(Subjekti u kojima KMUP-ovi obavljaju inspekcijski nadzor)

KMUP-ovi obavljaju inspekcijski nadzor nad provođenjem mjera zaštite od požara u:

- a) skladištima eksplozivnih materija za upotrebu u privredi;

- b) objektima i postrojenjima za proizvodnju energije nazivne snage do 35 MW;
- c) skladištima zapaljivih tečnosti kapaciteta do 1.000 m³;
- d) skladištima zapaljivih gasova kapaciteta do 30 m³;
- e) pravnim licima za proizvodnju i skladištenje tehničkih plinova kapaciteta do 30 m³;
- f) skladištima zapaljivih gasova u bocama kapaciteta do 5.000 kg;
- g) objektima hemijske, tekstilne i drvne industrije i drugim industrijskim objektima na području kantona;
- h) trgovinskom prometu i skladištenju pirotehničkih sredstava;
- i) pravnim licima i organima uprave kantona i drugim institucijama kojima je povjereno na upravljanje područje prirodnog i kulturno-historijskog naslijeđa od značaja za kanton, općinu i grad;
- j) državnim organima i drugim institucijama koje se bave poslovima arhive i arhivske građe iz nadležnosti kantona, općina i grada;
- k) objektima masovnog okupljanja građana (koncertne dvorane, stadioni, sportske dvorane itd.);
- l) objektima u vlasništvu kantona, općina i grada;
- m) objektima fizičkih i pravnih lica u privatnom vlasništvu koji nisu u kategoriji industrijskih objekata;
- n) pravnim licima koja obavljaju kontrolu ispravnosti, servisiranje i održavanje aparata za gašenje početnog požara;
- o) po potrebi, sarađuju u akcijama policije, vezanim za kontrolu prometa eksplozivnih i drugih opasnih materija iz nadležnosti kantona;
- p) po potrebi i pozivu nadležnog organa, učestvuju u radu operativnih ekipa na razjašnjenju uzroka i utvrđivanju odgovornosti za nastanak požara, eksplozija, havarija i akcidenata s opasnim materijama iz nadležnosti kantonalnih ministarstava za unutrašnje poslove gdje je nastala veća materijalna šteta i/ili su nastupile posljedice po ljudske živote.

Član 89.

(Lica koja provode inspekcijski nadzor)

(1) Poslove inspekcijskog nadzora iz člana 86. ovog zakona vezano za oblast zaštite od požara iz nadležnosti FMUP-a obavljaju federalni inspektori za zaštitu od požara, a iz nadležnosti KMUP-a obavljaju kantonalni inspektori za zaštitu od požara (u daljnjem tekstu: inspektori).

(2) Inspektori iz stava (1) ovog člana mogu biti lica koja ispunjavaju uslove predviđene za inspektore iz člana 90. stav (3) ovog zakona.

(3) Ministar će propisati sadržaj i način obavljanja poslova inspekcijskog nadzora iz stava (1) ovog člana, kao i druga pitanja koja se odnose na inspekcijski nadzor.

Član 90.

(Provođenje inspekcijskog nadzora)

(1) Poslove inspekcijskog nadzora iz oblasti zaštite od požara obavljaju federalni inspektori zaštite od požara i kantonalni inspektori zaštite od požara, koji imaju prava i dužnosti inspektora utvrđene u Zakonu o organizaciji organa uprave u Federaciji Bosne i Hercegovine. Inspekcijski nadzor se provodi prema odredbama ovog zakona i odredbama Zakona o upravnom postupku.

(2) Osim inspekcijskog nadzora nad provođenjem ovog zakona, inspektori obavljaju i inspekcijski nadzor nad provođenjem drugih zakona i propisa donesenih na temelju tih zakona u slučajevima kada je to propisano posebnim propisima.

(3) Inspektori iz stava (1) ovog člana mogu biti lica koja imaju najmanje visoku stručnu spremu tehničko-tehnološkog smjera, VII stepen, iz oblasti zaštite od požara, zaštite na radu i drugih tehničkih struka, najmanje pet godina radnog staža, odnosno visoko obrazovanje prvog, drugog ili trećeg ciklusa Bolonjskog sistema studiranja (koji se vrednuje sa 240 ECTS bodova), položen stručni ispit iz zaštite od požara po programu koji donosi ministar.

(4) Na dan stupanja na snagu ovog zakona državni službenici koji su postavljeni na radno mjesto inspektora za zaštitu od požara u ministarstvima unutrašnjih poslova ostaju na tim poslovima.

Član 91.

(Uslovi rada za inspektore)

Inspektorima za zaštitu od požara iz člana 85. ovog zakona, u skladu s odredbama Zakona o plaćama i naknadama u organima vlasti Federacije Bosne i Hercegovine („Službene novine Federacije BiH“, broj 45/10), pripada pravo dodatka na plaću.

Član 92.

(Način obavljanja inspekcijskog nadzora)

(1) Inspektori iz člana 85. stav (1) ovog zakona inspekcijski nadzor obavljaju u skladu s ovim zakonom i propisima i pravilima tehničke prakse.

(2) O obavljenom inspekcijskom nadzoru inspektor je dužan sastaviti zapisnik. Kopija sačinjenog zapisnika uručuje se vlasniku, odnosno korisniku kod kojeg je izvršen nadzor.

(3) Inspektor je dužan pročitati sadržaj zapisnika subjektu nadzora, nakon čega subjekt nadzora ima pravo staviti primjedbe na zapisnik o izvršenom inspekcijskom nadzoru, i to istovremeno sa sačinjavanjem zapisnika ili u roku tri dana od prijema zapisnika.

(4) Sadržaj i način vođenja Zapisnika o inspekcijskom nadzoru propisat će se u propisu iz člana 89. stav (3) ovog zakona.

Član 93.

(Donošenje upravnog akta po obavljenom inspekcijskom nadzoru)

1) Radi sprečavanja nastajanja i širenja požara, omogućavanja gašenja požara i spašavanja ljudi i imovine ugroženih požarom, inspektor za zaštitu od požara ima ovlaštenje da rješenjem naredi preduzimanje svih mjera propisanih ovim zakonom, propisima i aktima donesenim na osnovu ovog zakona, kao i mjera u funkciji zaštite od požara propisanih drugim zakonima, tehničkim propisima i standardima, uključujući i priznata pravila tehničke prakse u situaciji kad ne postoje odgovarajući domaći propisi, a naročito da se:

a) obavi ispitivanje ispravnosti i funkcionalnosti postrojenja, instalacija ili uređaja od kojih prijeti opasnost za izbijanje požara ili su u funkciji zaštite od požara, gašenja i sprečavanja širenja požara;

b) dovedu u ispravno stanje ili da se preurede, premjeste, odnosno demontiraju postrojenja, instalacije ili uređaji od kojih prijete opasnost za izbijanje požara;

c) dovedu u ispravno i funkcionalno stanje postrojenja, instalacije ili uređaji koji su u funkciji zaštite od požara, gašenja i sprečavanja širenja požara;

d) uradi popravka, rekonstrukcija, dogradnja i pregradnja na objektima u svrhu sprečavanja izbijanja i širenja požara ili spašavanja ljudi i materijalnih dobara;

e) zabrani upotreba objekta ili postrojenja, uređaja i instalacija ako se njihovim preuređenjem ili drugim mjerama ne može otkloniti opasnost od požara po ljude i tuđa materijalna dobra;

f) uklone građevinske i druge fizičke prepreke, predmete i materijal koji bi u slučaju izbijanja požara predstavljali smetnju za brzu i efikasnu evakuaciju ljudi i gašenje požara ili bi svojim izgledom ili funkcijom mogli dovesti u zabludu ljude koji se evakuuju;

g) uklone zapaljive materijale koji su ugrađeni u konstruktivne elemente građevine ili su upotrijebljeni za horizontalne i vertikalne površine evakuacionih puteva ako ti materijali predstavljaju opasnost za nastanak i širenje požara ili u požaru razvijaju otrovne gasove ili preveliku količinu dima;

h) uklone i očiste otpadne materije i prašinu sa mjesta na kojima pogoduju izbijanju i širenju požara;

i) zabrani upotreba otvorenog plamena, iskrenja i žara, uključujući i uređaje koji ih mogu stvarati, na mjestima na kojima bi mogli izazvati požar;

j) zabrani upotreba ili držanje lakozapaljivih tečnosti i gasova, kao i posebno zapaljivih čvrstih materija ako se koriste na način koji nije siguran ili se drže na neuslovnim mjestima ili mjestima na kojima predstavljaju opasnost po okolinu;

k) poduzmu zaštitne mjere protiv namjernog ili slučajnog ubacivanja predmeta u objekte i prostore gdje bi mogli izazvati požar;

l) obilježe požarni putevi i putevi evakuacije, postave odgovarajući znaci, natpisi i uputstva, izvede sigurnosna i panik rasvjeta;

m) izvedu propisani izlazi iz objekata radi omogućavanja brzog izlaska ljudi u slučaju požara;

n) osigura stalni nadzor nad mjestima gdje su smještene zapaljive i eksplozivne materije;

o) osigura stalno, povremeno ili privremeno protivpožarno dežurstvo u građevinama ili vanjskom prostoru;

p) osiguraju stabilne, polustabilne, mobilne i druge odgovarajuće instalacije i uređaji za gašenje požara, dovoljan broj sredstava za gašenje požara, kao i instalacije za dojavu požara i druge instalacije i uređaji sa zaštitnim i kontrolnim djelovanjem u funkciji zaštite ljudi i materijalnih dobara;

r) zabrani daljnje izvođenje radova dok izvođač radova ne poduzme potrebne mjere za sprečavanje izbijanja širenja požara i ne osigura potrebna sredstva i opremu za gašenje požara i ne uradi elaborat iz člana 57. stav (1) ovog zakona;

s) uklone nedostaci u projektnoj dokumentaciji koja nije u skladu sa propisima, standardima i drugim normativima u funkciji zaštite od požara, a prema potrebi i da zabrani daljnje izvođenje radova dok se navedeni propusti ne uklone;

t) izradi plan zaštite od požara, a prema procjeni ugroženosti od požara;

u) naredi poduzimanje drugih mjera propisanih tehničkim propisima radi sprečavanja izbijanja i širenja požara i

v) preduzmu i druge mjere u funkciji zaštite od požara, kao i mjere koje nisu propisane domaćim zakonima i propisima, ali su kao takve ozakonjene ili publikovane i priznate tehničkom praksom u svijetu.

(2) Prije određivanja mjera iz tačke od a) do e) stava 1. ovog člana, inspektor može odrediti stručni komisijski pregled objekta i postrojenja ako ocijeni da je taj pregled neophodan.

Član 94.

(Ovlaštenja inspektora u toku provođenja inspekcijskog nadzora)

(1) Pri provođenju inspekcijskog nadzora, inspektor ima sljedeća ovlaštenja:

a) pregledati sve zatvorene prostorije i otvorene prostore, postrojenja i uređaje te poduzeti druge radnje potrebne za utvrđivanje primjene propisanih i naređenih mjera zaštite od požara,

b) može ući u stan na traženje stanara ili radi otklanjanja ozbiljne neposredne opasnosti od požara po život i zdravlje ljudi ili materijalnih dobara većeg obima,

c) privremeno oduzeti dokumentaciju, opremu i sredstva te ostalo u vezi sa zaštitom od požara kada je to potrebno radi pravilnog vođenja postupka ili ako mogu poslužiti u prekršajnom ili sudskom postupku kao dokaz ili je to potrebno radi sprečavanja težih posljedica, o čemu izdaje potvrdu.

(2) Pravno lice i drugi vlasnici ili korisnici građevina i prostora dužni su omogućiti inspektoru obavljanje inspekcijskog nadzora i na njegovo traženje pružiti potrebne podatke, dokumente i obavještenja.

Član 95.

(Kontrolni inspekcijski nadzor)

(1) Inspektor prati izvršenje upravne mjere po službenoj dužnosti na osnovu obavljenog kontrolnog inspekcijskog nadzora i drugih dokaza i saznanja, o čemu sačinjava poseban zapisnik.

(2) Ako se radi o manje složenim predmetima ili kada se radi o izvršenju jedne radnje, o izvršenju upravne mjere može se sačiniti službena zabilješka.

(3) U provođenju nadzora inspektor pazi da se provede pravilno i u skladu sa zaključkom o dozvoli izvršenja i daje uputstva neposrednom izvršiocu ili licu koje rukovodi njihovim radom.

Član 96.

(Rješenje o zabrani ili ograničenju)

Ako postoji neposredna opasnost od nastanka požara ili eksplozije i ako je ugrožen život i zdravlje ljudi i njihova materijalna dobra i ako drugim mjerama nije moguće otkloniti opasnost, inspektor će svojim rješenjem ograničiti ili zabraniti:

a) korištenje građevine i rad u građevini;

b) rad pojedinog uređaja;

c) upotrebu zapaljivih, eksplozivnih i drugih opasnih materija, tehnoloških postupaka ili proizvoda;

d) obavljanje pojedinih djelatnosti ili poslova.

Član 97.

(Rješenja o naloženim mjerama inspektora)

(1) Sve mjere iz čl. 93. i 96. ovog zakona inspektor naređuje rješenjem.

(2) Protiv rješenja federalnog inspektora za zaštitu od požara može se izjaviti žalba u roku od osam dana od dana prijema rješenja. Žalba se izjavljuje federalnom ministru unutrašnjih poslova.

(3) Rješenje doneseno po žalbi iz stava 2. ovog člana je konačno i protiv njega se može pokrenuti upravni spor kod nadležnog suda u roku od 30 dana od dana prijema rješenja.

(4) U rješenju iz čl. 93. i 96. ovog zakona inspektor može odrediti da žalba ne odlaže izvršenje rješenja.

(5) Pravna lica i vlasnici te korisnici građevina i prostora i upravnik / upravitelj stambenog prostora i odgovorna lica za organizovanje zaštite od požara dužni su postupiti po rješenju inspektora iz stava 1. ovog člana.

Član 98.

(Žalba na rješenje kantonalnog inspektora)

(1) Protiv rješenja kantonalnog inspektora za zaštitu od požara može se izjaviti žalba Inspektoratu FMUP-a u roku od osam dana od dana prijema rješenja.

(2) Na rješenje doneseno po žalbi iz stava (1) ovog člana primjenjuje se odredba člana 97. stav (3) ovog zakona.

Član 99.

(Produženje roka za izvršenje upravne mjere)

(1) Nadležni inspektor može na zahtjev subjekta nadzora produžiti rok izvršenja upravne mjere ukoliko propisom, na osnovu kojeg je upravna mjera naložena, nije izričito propisana zabrana odgađanja izvršenja rješenja.

(2) Izvršenje upravne mjere može se produžiti 30 dana ako su ispunjeni sljedeći uslovi:

a) subjekt nadzora ima dokaz o registraciji i dozvolu za rad, a upravna mjera se odnosi na otklanjanje drugih propusta i nepravilnosti,

b) subjekt nadzora je započeo s izvršenjem upravne mjere,

c) na osnovu cjelokupnog ponašanja subjekta nadzora osnovano se može očekivati da će izvršiti upravnu mjeru u produženom roku za izvršenje.

(3) O zahtjevu za produženje roka za izvršenje upravne mjere odlučuje inspektor koji je donio rješenje, o čemu donosi zaključak, protiv kojeg se ne može izjaviti posebna žalba.

Član 100.

(Inspekcijски nadzor na provođenjem mjera zaštite od požara u šumama i na šumskim zemljištima)

(1) Inspekcijски nadzor nad provođenjem mjera zaštite od požara u šumama i na šumskom zemljištu obavljaju šumarski inspektori, na poljoprivrednom zemljištu obavljaju poljoprivredni inspektori, a za zaštićena područja prirodnog i kulturno-

historijskog naslijeđa nadzor obavljaju inspektori iz te oblasti prema propisima kojima su uređene inspekcije u tim oblastima.

(2) Federalni i kantonalni inspektori iz stava (1) ovog člana, pri provođenju tog inspekcijskog nadzora, imaju ovlaštenja inspektora utvrđena u propisima koji se odnose na te inspekcije.

POGLAVLJE VII - OVLAŠTENJE ZA DONOŠENJE PODZAKONSKIH PROPISA

Član 101.

(Propisi koje donosi Vlada Federacije)

Vlada Federacije na prijedlog ministra donosi propise i to:

- a) propis za izradu procjene ugroženosti od požara (član 22. stav (2)),
- b) propis o planu zaštite od požara, načinu i postupku izrade plana zaštite od požara (član 24. stav (4)),
- c) propis o osnovama, mjerilima i uvjetima kategorizacije požarne ugroženosti (član 37. stav (4)).

Član 102.

(Propisi koje donosi ministar)

Ministar donosi propise:

- a) propis o načinu i postupku izdavanja i/ili oduzimanja odobrenja za projektovanje mjera zaštite od požara i/ili kontrole / revizije dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara (član 38. stav (6));
- b) propis o načinu i postupku izrade elaborata zaštite od požara i projektovanje sistema aktivne zaštite od požara (član 39. stav (3));
- c) propis o načinu polaganja stručnog ispita za projektovanje mjera zaštite od požara i/ili pružanje intelektualnih usluga iz oblasti zaštite od požara (član 47. stav (4));
- d) propis o uslovima koje moraju ispunjavati pravna lica koja obavljaju kontrolu ispravnosti, servisiranje i održavanje aparata, kao i sadržaj i način polaganja ispita za lica koja lično (neposredno) obavljaju poslove ispitivanja, servisiranja i održavanja aparata, te druga pitanja koja se odnose na ispitivanje, održavanje i servisiranje aparata za gašenje početnih požara (član 49. stav (6));
- e) program obuke za osposobljavanje pripadnika specijalističko-spasilačkih poslova i način polaganja tog ispita (član 58. stav (4));
- f) propis o uslovima izdavanja odobrenja koja moraju imati pravna lica koja obavljaju poslove ugradnje i/ili provjere i ispitivanja ispravnosti i funkcionalnosti aktivnog sistema, sadržaj potvrde o ispravnosti, kao i program i način polaganja stručnog ispita za obavljanje tih poslova (član 59. stav (9));
- g) propis o sadržaju operativnog informacionog sistema iz oblasti zaštite od požara te načinu dostavljanja, obrade i objavljivanja podataka (član 68. stav (4));
- h) propis o sadržaj programa obuke i provjeri znanja te načinu polaganja ispita za zaposlena lica koja se staraju za obavljanje poslova zaštite od požara (član 69. stav (6));

- i) propis o sadržaju i načinu obavljanja poslova inspekcijskog nadzora zaštite od požara (član 89. stav (3));
- j) propis o tehničkim normativima za zaštitu skladišta od požara i eksplozija;
- k) propis o sistemima za automatsku dojavu i gašenje požara i uslovima za ispitivanje uvezenih uređaja;
- l) propis o osnovnim zahtjevima za opremu, zaštitne sisteme i komponente namijenjene eksplozivnoj atmosferi gasova, para, maglica i prašina.

Član 103.

(Propisi koje donosi Federalno ministarstvo energije, rudarstva i industrije u saradnji sa FMUP-om)

Federalno ministarstvo energije, rudarstva i industrije u saradnji sa FMUP-om, donosi:

- a) propis o tehničkim normativima za uređaje za automatsko zatvaranje vrata i klapni otpornih na vatru;
- b) propis o tehničkim normativima za uređaje u kojima se nanose i suše premazna sredstva;
- c) propis o uslovima koje moraju ispunjavati pravna lica ovlaštena za certifikovanje požarnih karakteristika materijala i elemenata građevinskih konstrukcija;
- d) propis o tehničkim normativima za zaštitu od požara i eksplozije pri čišćenju sudova za zapaljive tečnosti;
- e) propis o tehničkim normativima za projektovanje, građenje i održavanje gasnih kotlovnica;
- f) propis o tehničkom nadzoru električnih postrojenja, instalacija i uređaja namijenjenih za rad u prostorima ugroženim eksplozivnom atmosferom;
- g) propis o mjerama zaštite od požara pri izvođenju radova zavarivanja, rezanja i lemljenja;
- h) propis o tehničkim normativima o gromobranima;
- i) propis o smještaju i držanju ulja za loženje;
- j) propis o skladištenju zapaljivih tečnosti i gasova;
- k) propis o stanicama za snabdijevanje gorivom, gasovima i za punjenje motornih vozila električnom energijom;
- l) propis o zaštiti od požara termoenergetskih postrojenja.

Član 104.

(Propisi koje donosi Federalno ministarstvo prostornog uređenja u saradnji sa FMUP-om)

Federalno ministarstvo prostornog uređenja, u saradnji sa FMUP-om, donosi:

- a) propis za zaštitu visokih objekata od požara;
- b) propis o zaštiti od požara građevina za javnu upotrebu;
- c) propis o tehničkim normativima za vanjsku i unutrašnju hidrantsku mrežu za gašenje;
- d) propis o tehničkim normativima za sisteme odvođenja dima i toplote nastalih u požaru i u saradnji sa Federalnim ministarstvom okoliša i turizma;
- e) propis o zaštiti od požara garaža za garažiranje automobila;

- f) propis o zaštiti od požara industrijskih i privrednih objekata.

Član 105.

(Propis koje donosi Federalno ministarstvom prometa i komunikacija u saradnji sa FMUP-om)

Federalno ministarstvo prometa i komunikacija, u saradnji sa FMUP-om, donosi propis o uslovima za vatrogasne pristupe i prolaze za stambene i druge zgrade i objekte i za sve prostore koji se smatraju građevinama i prostorima u skladu sa članom 34. stav (1) ovog zakona.

POGLAVLJE VIII - KAZNE ODREDBE

Član 106.

(Novčane kazne i prekršaji za pravna lica)

(1) Novčanom kaznom od 5.000,00 KM do 15.000,00 KM kaznit će se za prekršaj pravno lice ako:

- a) nije donesena procjena ugroženosti i plan zaštite od požara (čl. 22. i 23.);
- b) ne izvršava zadatke utvrđene u planu zaštite od požara (član 26.);
- c) ne donese opći akt iz člana 28. ovog zakona;
- d) ne provodi opće mjere za zaštitu od požara (član 33. stav 2.);
- e) u glavnom projektu mjere zaštite od požara nije prikazalo grafički, tekstualno niti je izdata potvrda kojom se potvrđuje da su mjere zaštite od požara primijenjene u glavnom projektu (član 38.);
- f) obavlja poslove a nema odobrenje za projektovanje mjera za zaštitu od požara i/ili kontrolu / reviziju dokumentacije i/ili posebnih sistema zaštite od požara i/ili pružanje intelektualnih usluga iz oblasti zaštite od požara (član 38. stav (5));
- g) nije izrađen elaborat zaštite od požara (član 39.);
- h) pri izradi elaborata za zaštitu od požara nije predvidjelo sve minimalne mjere koje sadrži elaborat (član. 39);
- i) je izradilo elaborat i/ili izdalo potvrdu o primijenjenim mjerama za zaštitu od požara bez ovlaštenja i/ili u suprotnosti sa tehničkim propisima iz člana 40. ovog zakona;
- j) nije izvršena predviđena kontrola / revizija od strane ovlaštenog pravnog lica u skladu sa članom 41. ovog zakona;
- k) nije pri projektovanju illi gradnji građevina i/ili ugradnji priključaka, opreme, uređaja i postrojenja predvidjelo i primijenilo mjere zaštite od požara (član 43.);
- l) nije izgrađeno požarno stepenište ili nužni izlazi i/ili prelazi (član 44.);
- m) upotrebljava instalacije i uređaje, dimovode i ložišta koji nisu ispravni i ne posjeduje dokumentaciju ili ne vrši redovno čišćenje ili kontrolu / pregled u skladu sa zakonskim propisima (član 45.);
- n) koristi građevinu bez odobrenja za njenu upotrebu (član 46.);
- o) obavlja proizvodnju i promet uređaja, opreme i sredstava namjenjenih za dojavu, gašenje i sprečavanje širenja požara koji nisu certifikovana u skladu sa članom 50. ovog zakona;
- p) obavlja promet zapaljivih, eksplozivnih i drugih opasnih materija koje nisu u skladu sa propisanim tehničkim normativima i standardima (član 51.);

- q) ne organizuje i ne provodi zaštitu od požara u šumama i na šumskom i poljoprivrednom zemljištu u skladu s odgovarajućim propisima (član 54.);
- r) ne organizuje i ne provodi zaštitu od požara prirodnog i kulturno-historijskog naslijeđa ili ne ažurira plan zaštite od požara (član 56.);
- s) ne izvršava obaveze u slučaju povećanog požarnog rizika (član 57.);
- t) u projektu nije predvidjelo i nije primijenilo mjere zaštite od požara ili nije izradilo elaborat zaštite od požara na gradilištu (član 57. st. (1) i (4));
- u) ne organizuje specijalističko-spasilačku jedinicu pravnog lica (član 58.);
- v) je izvršilo ugradnju i upotrebljava sistem aktivne zaštite od požara bez projektne dokumentacije i pribavljene potvrde o ispravnosti i funkcionalnosti sistema ili ne obavlja njegovu stalnu tehničku kontrolu (član 59. st. (1), (3) i (7));
- w) obavlja ugradnju i/ili ispitivanje sistema aktivne zaštite od požara bez odobrenja ili ako ne preda projekat izvedenog stanja, pristupne šifre / kodove i korisničko uputstvo o korištenju za centralu ugrađenog sistema aktivne zaštite od požara, ateste i certifikate vlasniku, odnosno korisniku (član 59. st. (2) i (3));
- x) ne osigurava propisani protočni kapacitet i pritisak vode u hidrantskoj i vodovodnoj mreži ili ne održava u ispravnom stanju hidrantsku mrežu ili ne obavlja ispitivanje ispravnosti i funkcionalnosti hidrantske mreže (član 60.);
- y) nije prije stavljanja u promet obavilo certifikovanje opreme, uređaja i drugih sredstava za zaštitu od požara sa propisima i standardima (član 62.);
- z) nije osiguralo finansijska sredstva za organizovanje, provođenje i unapređenje zaštite od požara (član 71. stav (2))
- aa) inspektoru onemogućiti obavljanje inspekcijskog nadzora (član 94. stav (2));
- bb) ne postupi po rješenju inspektora iz člana 97. stav (5) ovog zakona.

(2) Za prekršaj iz stava 1. ovog člana kaznit će se i odgovorno lice u pravnom licu i drugoj instituciji novčanom kaznom od 1.000,00 KM do 2.500,00 KM.

Član 107.

(Novčane kazne za pravno lice i druge institucije)

(1) Novčanom kaznom od 3.000,00 KM do 10.000,00 KM kaznit će se za prekršaj pravno lice i druga institucija ako:

- a) ne obezbijedi finansijska sredstva za realizaciju aktivnosti iz plana zaštite od požara (član 25.);
- b) ne odredi zaposleno lice zaduženo za provođenje mjera zaštite od požara (član 28. stav (1) tačka f);
- c) ne upozna zaposlena lica s općim aktom (član 28. stav (3));
- d) nije izvršilo nabavku potrebnog broja aparata za gašenje početnih požara, mobilnih prenosnih i prevoznih i/ili ako nije izvršeno održavanje i ispitivanje aparata na način predviđen u članu 49. ovog zakona ili ako vrši ispitivanje aparata bez odobrenja nadležnog organa;
- e) stavi u prodaju ili prodaje zapaljive, eksplozivne i druge opasne materije koje nisu upakovane u propisanu ambalažu i nema propisanu dokumentaciju izdatu od proizvođača (član 52.);
- f) u cestovnom, željezničkom, pomorskom, riječnom, jezerskom i avionskom saobraćaju ne provodi mjere zaštite od požara (član 53.);
- g) ne organizuje dežurstvo i ne izradi elaborat zaštite od požara za gradilište (član 57. stav (1));

h) ne drži u ispravnom stanju ili ne obavlja periodičnu kontrolu ispravnosti sistema aktivne zaštite (član 59.);

i) ne održava u ispravnom stanju instalacije (član 61.);

j) ne organizuje i ne provodi stručno osposobljavanje i usavršavanje zaposlenih lica za zaštitu od požara ili ne osigura polaganje ispita za protivpožarnu zaštitu (član 69.).

(2) Za prekršaj iz stava 1. ovog člana kaznit će se i odgovorno lice u pravnom licu i drugoj instituciji novčanom kaznom od 600,00 KM do 1.500,00 KM.

Član 108.

(Novčane kazne i prekršaji za rukovodioce organa uprave i upravne organizacije te druge institucije)

Novčanom kaznom od 1.000,00 KM do 2 500,00 KM kaznit će se za prekršaj rukovodilac organa uprave i upravne organizacije i druge institucije ako:

- a) nije donesena procjena ugroženosti i plan zaštite od požara (čl. 22. i 23.);
- b) ne uskladi plan zaštite od požara sa novonastalim promjenama ili ako ne donese poseban akt (član 24. st. (2) i (3));
- c) ne izvršava zadatke utvrđene u planu zaštite od požara (član 26.);
- d) ne donese opći akt iz člana 28. ovog zakona;
- e) ne provodi opće mjere za zaštitu od požara (član 33. stav (2));
- f) izda odobrenje za građenje bez pribavljene saglasnosti nadležnog MUP-a iz člana 42. ovog zakona;
- g) je izdato rješenje o odobrenju za građenje, odnosno izgradnju ili rekonstrukciju, dogradnju ili nadogradnju građevine, a nisu provedene sve mjere zaštite od požara (član 46. stav (2));
- h) ne organizuje i ne provodi stručno osposobljavanje i usavršavanje zaposlenih lica za zaštitu od požara (član 69.);
- i) ne dostavi podatke i dokumentaciju (član 82. stav (3));
- j) onemogući inspektora u obavljanju inspekcijskog nadzora ili ne pruži podatke, dokumente i obavještenja koja traži inspektor (član 94. stav (2));
- k) ne postupi po rješenju inspektora (član 97. stav (5)).

Član 109.

(Novčana kazna za vlasnika, odnosno korisnika građevine, građevinskih dijelova i drugih nekretnina i prostora, odnosno upravnika / upravitelja zgrade)

Novčanom kaznom u iznosu od 500,00 do 1.000,00 KM kaznit će se za prekršaj vlasnik, odnosno korisnik građevine, građevinskih dijelova i drugih nekretnina te prostora, odnosno upravnik / upravitelj zgrade ako:

a) ne poduzima mjere za smanjenje opasnosti od nastanka i širenja požara, kao i mjere za unapređenje stanja zaštite od požara na svom vlasništvu (član 31. tačka b);

b) ne posjeduje uređaje, opremu i sredstva za gašenje požara (član 31. tačka c);

c) u slučaju privremeno povećanog požarnog rizika, ne poduzme odgovarajuće dodatne, organizacijske i tehničke mjere zaštite od požara (član 57.);

d) ako ne posjeduje odgovarajuću dokumentaciju o ispravnosti i funkcionalnosti instalacija (član 61.).

Član 110.

(Novčana kazna i prekršaj za pojedinca - fizičko lice)

Novčanom kaznom od 100,00 KM do 800,00 KM kaznit će se za prekršaj fizičko lice ako:

- a) ne izvršava zadatke utvrđene u planu zaštite od požara (član 26.);
- b) ne provodi opće mjere za zaštitu od požara (član 33.);
- c) namjerno izazove požar, loži otvorenu vatru i spaljuje poljoprivredni i drugi gorivi otpad biljnog porijekla suprotno odredbama člana 33. stav (1) tačka f) ovog zakona;
- d) obavlja projektovanje mjera zaštite od požara i/ili posebnih sistema zaštite od požara i/ili pruža intelektualne usluge iz oblasti zaštite od požara bez položenog stručnog ispita (član 47.);
- e) ne nabavi odgovarajući broj i vrstu aparata i ne osigura održavanje i ispitivanje ispravnosti i funkcionalnosti aparata za početno gašenje požara (član 49.);
- f) se ne pridržava mjera zaštite od požara u slučaju privremenog povećanog požarnog rizika (član 57.);
- g) upotrebljava instalacije i uređaje, dimovode i ložišta koji nisu ispravni (član 61.);
- h) inspektoru onemogućuje provođenje inspeksijskog nadzora (član 94. stav (2));
- i) ne postupi po rješenju inspektora (član 97. stav (5)).

POGLAVLJE IX - PRELAZNE I ZAVRŠNE ODREDBE

Član 111.

(Usklađivanje propisa kantona, općina i gradova iz oblasti zaštite od požara s ovim zakonom)

Kantoni, gradovi i općine dužni su u roku od šest mjeseci od dana stupanja na snagu ovog zakona uskladiti svoje zakone, odnosno odluke općinskog i gradskog vijeća iz oblasti zaštite od požara s odredbama ovog zakona.

Član 112.

(Ovlaštenja nadležnih ministarstva za obavljanje stručnih poslova iz oblasti zaštite od požara)

(1) Pravna lica koja imaju ovlaštenja nadležnih ministarstva za obavljanje stručnih poslova iz oblasti zaštite od požara i obavljanje stručnih poslova ispitivanja ispravnosti ugrađenog sistema aktivne zaštite od požara dužna su u roku od godinu dana od dana stupanja na snagu ovog zakona podnijeti zahtjev za izdavanje odobrenja prema ovom zakonu.

(2) Lica koja imaju položen ispit za obavljanje stručnih poslova provjere i ispitivanja ispravnosti sistema aktivne zaštite od požara kod nadležnog federalnog ministarstva mogu i dalje obavljati te poslove prema ovom zakonu.

Član 113.

(Projektovanje zaštite od požara)

Lica koja imaju položen stručni ispit za projektovanje kod nadležnog federalnog ministarstva mogu vršiti projektovanje zaštite od požara prema ovom zakonu.

Član 114.

(Provođenje obuke za zaštitu od požara)

(1) Pravna lica koja imaju odobrenje za provođenje obuke za zaštitu od požara dužna su u roku od godinu dana od dana stupanja na snagu ovog zakona podnijeti zahtjev za izdavanje odobrenja prema ovom zakonu.

(2) Lica koja imaju položen ispit za zaštitu od požara do stupanja na snagu ovog zakona mogu obavljati poslove zaštite od požara prema ovom zakonu.

Član 115.

(Usklađivanje općih akata i poslovanja)

Subjekti iz člana 3. ovog zakona dužni su da usklade svoje opće akte i poslovanje koji se odnose na zaštitu od požara s odredbama ovog zakona u roku od godinu dana od dana stupanja na snagu Zakona.

Član 116.

(Rješavanje zahtjeva koji su podneseni do stupanja na snagu ovog zakona)

Zahtjevi koji su podneseni do stupanja na snagu ovog zakona rješavat će se prema odredbama zakona koji je važio do stupanja na snagu ovog zakona.

Član 117.

(Važenje postojećih propisa i rok za donošenje propisa prema ovom zakonu)

(1) Postojeći podzakonski propisi koji se odnose na pitanja iz čl. od 101. do 104. ovog zakona ostaju na snazi do donošenja propisa predviđenih u tim zakonskim odredbama ukoliko nisu u suprotnosti s odredbama ovog zakona.

(2) Podzakonski propisi predviđeni ovim zakonom donijet će se u roku od godinu dana od dana stupanja na snagu ovog zakona.

Član 118.

(Prestanak primjene odredbi Zakona o zaštiti od požara i vatrogastvu)

Danom stupanja na snagu ovog zakona prestaje primjena odredbi čl. od 2. do 55. i odredbi čl. od 145. do 176. Zakona o zaštiti od požara i vatrogastvu („Službene novine Federacije BiH“, broj 64/09).

Član 119.

(Stupanje na snagu Zakona)

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE NACRTA ZAKONA O ZAŠTITI OD POŽARA

I - USTAVNI OSNOV ZA DONOŠENJE ZAKONA

Ustavni osnov za donošenje Zakona o zaštiti od požara je sadržan u odredbi člana IV A. 20. (1) d) Ustava Federacije Bosne i Hercegovine, u kojoj je propisano da je Parlament Federacije nadležan za donošenje zakona o obnašanju dužnosti federalne vlasti. Budući da se ovim zakonom detaljno uređuje funkcionisanje cjelokupnog sistema zaštite od požara u Federaciji Bosne i Hercegovine, a što spada u obavljanje dužnosti federalne vlasti, navedena ustavna odredba predstavlja ustavni osnov za njegovo donošenje.

II - RAZLOZI ZA DONOŠENJE ZAKONA

Vlada Federacije Bosne i Hercegovine je razmatrala Izvještaj o inspekcijskom nadzoru iz oblasti zaštite od požara te je donijela zaključak kojim je naložila Federalnom ministru unutrašnjih poslova da imenuje radnu grupu koja će izraditi poseban zakon o zaštiti od požara.

Važećim Zakonom o zaštiti od požara i vatrogastvu poslovi zaštite od požara organizovani su većim dijelom u okviru Federalne uprave civilne zaštite, što je u suprotnosti s odredbama Zakona o federalnim ministarstvima i drugim tijelima federalne uprave, jer je tim zakonom definisano da su poslovi zaštite od požara u djelokrugu poslova Federalnog ministarstva unutrašnjih poslova.

Također, u obavljanju poslova inspekcijskog nadzora iz oblasti zaštite od požara iz djelokruga federalnih i kantonalnih inspektora utvrđene su određene manjkavosti zakonskih rješenja koje onemogućuju pravilnu i zakonitu primjenu mjera zaštite od požara utvrđenih Zakonom o zaštiti od požara i vatrogastvu. To se naročito odnosi na primjenu mjera zaštite od požara u toku građenja i sistema aktivne zaštite od požara.

S obzirom na to da su navedena pitanja iz isključive nadležnosti organa unutrašnjih poslova, odlučeno je da se pristupi izradi novog zakona o zaštiti od požara.

Zakon o zaštiti od požara i vatrogastvu u cijelosti nije primijenjen zbog nedonošenja niza podzakonskih propisa koje, prema navedenom zakonu, treba da donese Federalno ministarstvo energije, rudarstva i industrije, tako da se za pojedina pitanja primjenjuju propisi koji su objavljeni u „Službenom listu SRBiH“. Radi donošenja tih propisa neophodnih u provođenju poslova iz oblasti zaštite od požara potrebno je da nosilac njihove izrade bude Federalno ministarstvo unutrašnjih poslova, što zahtijeva intervenciju u važećem Zakonu o zaštiti od požara i vatrogastvu („Službene novine Federacije BiH“, broj 69/09).

III - OBRAZLOŽENJE PREDLOŽENIH RJEŠENJA

Nacrt zakona je sistematizovan u devet samostalnih poglavlja, koja zajednički čine jednu cjelinu i regulišu oblast zaštite od požara. Ovim nacrtom zakona predviđeno je i donošenje 34 podzakonska propisa kojima bi se bliže definisala pojedina pitanja iz oblasti zaštite od požara i zajedno sa njim predstavljaju

normativno uređen sistem zaštite od požara Federacije BiH. Radi jedinstvenog postupanja i praćenja pitanja iz oblasti zaštite od požara, ovim nacrtom zakona predloženo je da poslove upravnog nadzora inspekcije obavljaju organi unutrašnjih poslova u odnosu na rješenja iz važećeg Zakona o zaštiti od požara i vatrogastvu gdje je poslove upravnog i inspekcijskog nadzora izvršavalo više organa.

Poglavljem I - Osnovne odredbe (čl. od 1. do 14.) definisana su osnovna pitanja koja se odnose na zaštitu od požara a, prije svega, način funkcionisanja i organizovanja poslova zaštite od požara, obaveze subjekata, odnosno nosilaca zaštite od požara, preventivne mjere zaštite od požara te druga pitanja i pojmovi koji predstavljaju osnovu za njihovo bliže definisanje i razradu u drugim poglavljima ovog zakona.

Poglavljem II - Nadležnosti, organizacija i funkcionisanje, planiranje i provođenje mjera zaštite od požara (čl. od 15. do 68.) definisani su nadležni organi koji obavljaju poslove iz oblasti zaštite od požara te organizacija i način funkcionisanja zaštite od požara u Federaciji BiH, kao i planiranje i provođenje mjera za zaštitu koje se odnose na zaštitu od požara. U okviru ovog poglavlja utvrđeni su, odnosno takstavno nabrajani organi uprave koji preduzimaju radnje iz oblasti zaštite od požara. To su federalni i kantonalni organi uprave, pri čemu su osnovni nosioci tih poslova Federalno ministarstvo unutrašnjih poslova i kantonalna ministarstva unutrašnjih poslova. Imajući u vidu da se organizacija i funkcionisanje zaštite od požara u Federaciji, kantonu, gradu i općini uređuje planom zaštite od požara u odredbama čl. od 23. do 27. uređeno je u cijelosti pitanje izrade i sadržaja plana zaštite od požara.

U čl. 28. i 29. uređena su pitanja planiranja i provođenja mjera zaštite od požara u kojima je propisano koja pitanja iz oblasti zaštite od požara, zavisno od vrste djelatnosti kojom se bave pravna lica i organi uprave, trebaju da uredе svojim općim aktom te način praćenja i provođenja mjera utvrđenih tim općim aktom.

U čl. od 30. do 35. definisana su pitanja odgovornosti vlasnika, odnosno korisnika građevine i prostora za zaštitu od požara, uređenje dimnjačarske djelatnosti, mjere zaštite od požara građevina, mjere zaštite od požara u oblasti prostornog planiranja kao i posebni uslovi građenja. U okviru ovih članova uređeno je posebno pitanje mjera zaštite od požara u oblasti planiranja koje nije bilo definisano važećim Zakonom o zaštiti od požara i vatrogastvu, kao i pitanje posebnih uslova građenja.

U čl. 36. i 37. razrađeno je pitanje kategorizacije građevina po ugroženosti od požara koje su podijeljene u: PU1, PU2 i PU3.

U čl. od 38. do 42. uređena su pitanja koja se odnose na izradu elaborata o zaštiti od požara, koji je sastavni dio dokumentacije glavnog projekta svake građevine. Tokom provođenja mjera zaštite od požara koje su propisane elaboratom o zaštiti od požara, utvrđeno je da se one ne mogu pratiti, što je zahtijevalo potrebu preciznijeg definisanja propisom koji reguliše pitanje zaštite od požara. Pitanje izrade elaborata o zaštiti od požara nije regulisano propisima iz oblasti prostornog planiranja. Davanje saglasnosti na elaborate osigurat će se praćenje mjera za zaštitu od požara od samog procesa izgradnje objekta, što prije toga nije bilo moguće.

U čl. od 43. do 48. definisano je kako građevine moraju biti projektovane i izgrađene, pitanje požarnog stepeništa te projektovanje i postavljanje električnih, ventilacionih, gasnih, naftovodnih, toplovodnih, gromobranskih i drugih instalacija. Ovim zakonom je definisan i stručni ispit za projektovanje mjera za zaštitu od požara

i/ili posebnih sistema za zaštitu od požara i/ili pružanje intelektualnih usluga iz oblasti zaštite od požara.

U čl. 49. i 50. uređeno je pitanje održavanja i ispitivanja aparata za gašenje početnih požara te proizvodnja i promet uređaja, opreme i sredstava namijenjenih za zaštitu od požara i eksplozije.

U čl. 51. i 52. definisano je pitanje primjene mjera od požara kod prometa i prodaje zapaljivih, eksplozivnih i drugih opasnih materija.

U čl. od 53. do 56. definisano je provođenje i planiranje mjera zaštite od požara u oblastima saobraćaja, u šumama, na šumskom i poljoprivrednom zemljištu, u rudarskim objektima i lokalitetima prirodnog i kulturnog-historijskog naslijeđa.

U čl. 57. i 58. definisana su pitanja mjera zaštite od požara u slučaju povećanog požarnog rizika te specijalističko-spasilački poslovi u pravnim licima.

U čl. od 59. do 62. definisana su pitanja sistema aktivne zaštite od požara, održavanje instalacija i certifikata o usklađenosti opreme.

U čl. 63. i 64. definisano je pitanje osiguranja od požara i nosioci osiguranja od požara.

U čl. od 65. do 68. propisan je način i postupak upoznavanja javnosti i formiranje informacionog sistema zaštite od požara. Informacioni sistem zaštite od požara definisan je kao operativni centar za zaštitu od požara, čija je svrha sakupljanje i obrada podataka o događajima značajnim za zaštitu od požara.

Poglavljem III - Stručno osposobljavanje i usavršavanje zaposlenih lica za zaštitu od požara (čl. od 69. do 70.) uređena su pitanja koja se odnose na stručnu obuku lica koja su zaposlena u institucijama i drugim pravnim licima u vezi sa zaštitom od požara, kao i postupak provođenja te obuke.

Poglavljem IV - Finansiranje zaštite od požara (čl. od 71. do 75.) uređeno je pitanje finansiranja zaštite od požara iz budžeta u institucijama FBiH. Imajući u vidu društveni zanačaj zaštite od požara, kao opći javni interes svakog društva, neophodno je zakonom jasno osigurati obavezu nosilaca zaštite od požara da u budžetima predvide finansijska sredstva za realizaciju tih mjera.

Poglavljem V - Izveštavanje i evidencije (čl. od 76. do 81.) uređeno je pitanje izveštavanja i vrste evidencija koje se vode o pitanju zaštite od požara.

Poglavljem VI - Nadzor nad provođenjem ovog zakona (čl. od 82. do 100.) uređena su pitanja koja se odnose na upravni nadzor i inspekcijski nadzor iz oblasti zaštite od požara.

Poglavljem VII - Ovlaštenje za donošenje podzakonskih propisa (čl. od 101. do 104.) definisani su propisi koji će se donijeti prema ovom zakonu i rok za njihovo donošenje.

Poglavljem VIII - Kaznene odredbe (čl. 106. do 110.) definisane su prekršajne radnje i prekršajne sankcije za utvrđene prekršaje.

Poglavljem IX - Prelazne i završne odredbe (čl. od 111. do 119). regulisana su pitanja koja spadaju u prelazne i završne odredbe, odnosno pitanje stupanja na snagu Zakona i rješavanje zahtjeva koji su podneseni do stupanja na snagu ovog zakona.

IV - USKLAĐENOST PROPISA S EVROPSKIM ZAKONODAVSTVOM

Federalno ministarstvo unutrašnjih poslova nije moglo utvrditi da postoji primarni i sekundarni izvor prava Evropske unije koji na poseban način regulišu pitanja koja su regulisana navedenim zakonom.

V - PROVEDBENI MEHANIZMI I NAČIN OSIGURANJA POŠTIVANJA PROPISA

Provođenje Zakona o zaštiti od požara osigurat će Federalno ministarstvo unutrašnjih poslova i kantonalna ministarstva unutrašnjih poslova pravilnim provođenjem nadzora nad primjenom ovog zakona te izdavanjem odobrenja i saglasnosti po zahtjevima i aktima pravnih lica u skladu s ovim zakonom.

VI - OPIS KONSULTACIJA VOĐENIH U PROCESU IZRADE PROPISA

Konsultacije su obavljene u skladu sa članom 11. st. (1) i (2) tačka a) Uredbe o pravilima za učešće zainteresirane javnosti u postupku pripreme federalnih pravnih propisa i drugih akata („Službene novine Federacije BiH“, broj 51/12). Federalni ministar odlučio je da se o Prednacrtu zakona o zaštiti od požara obave konsultacije u pogledu traženja pismenih komentara putem objavljivanja tog prednacrt na stranici Federalnog ministarstva unutrašnjih poslova (navedeni prednacrt zakona objavljen je na internetskoj stranici: [www. fmup.gov.ba](http://www.fmup.gov.ba)).

U postupku konsultacija učestvovalo je više od 60 subjekata i dato je više od 250 primjedbi i sugestija.

Svoje primjedbe i sugestije dostavili su sljedeći subjekti:

- a) Udruženje društava za osiguranje u Federaciji Bosne i Hercegovine;
- b) Savez općina i gradova Federacije Bosne i Hercegovine;
- c) Općina Busovača;
- d) Općina Foča - Ustikolina;
- e) Grad Goražde;
- f) Općina Gradačac;
- g) Općina Jablanica;
- h) Općina Lukavac;
- i) Općina Tešanj;
- j) Društvo za proizvodnju, promet i usluge „Filling“ d.o.o;
- k) Federalna uprava civilne zaštite;
- l) DSC d.o.o. Sarajevo;
- m) Azuri;
- n) HSC d.o.o. Ministarstvo unutrašnjih poslova ZDK;
- o) Agencija za vodno područje rijeke Save - Sarajevo;
- p) Arcus d.o.o.;
- q) Udruženje dimnjačara u Bosni i Hercegovini;
- r) Tehnosigurnost;
- s) D.o.o. „Granulo-RE“ Sarajevo;
- t) Fizičko lice Haris Burek;
- u) Ministarstvo unutrašnjih poslova HNK;
- v) Federalna uprava za inspekcijske poslove;
- w) JP Elektroprivreda d.d Mostar;
- x) Maher;
- y) Elektroprenos BiH;
- z) Federalno ministarstvo prometa i komunikacija;
- aa) Federalno ministarstvo prostornog uređenja.

Inspektorat za nadzor rada agencija i unutrašnjih službi za zaštitu ljudi i imovine i zaštitu od požara razmotrio je date primjedbe i sugestije. One koje je smatrao osnovanim ugrađene su u tekst Prednacrtu zakona, koji je dostavljen federalnom ministru unutrašnjih poslova na daljnje postupanje aktom broj: 05-14-2-808/17 od 26. 3. 2019.

VII - FINANSIJSKA SREDSTVA

Za realizaciju ovog zakona dodatna sredstva u Budžetu Federacije Bosne i Hercegovine prikazana su u Obrascu izjave o fiskalnoj procjeni.